



PAMAHBAH.

Mangda danganan karma lan Warga desane sami ngeresepang daging awig-awig puniki, kruna- kruna wyadin lengkara sane munggah iriki kautsahayang ngangge Base Bali Madya Ketah, sane kapasupati tur sane kasimpen ring Pura Desa taler dagingnyane pacang kasobyahang ring Krama lan Warga Desane sami melarapan ngwacen ring suang –suang Banjar Adat Olih Prajuru Adat manut galah irika.

Krama Desa Adat Mengwitani, wawidangan Prebekel Mengwitani, Kecamatan Mengwi, Kabupaten Badung, ngawit saking tahun Masehi 1930 sampun madruwe awig – awig masurat ring lontar sane munggah ring Pura Desa Adat Mengwitani, sakewanten susunan miwah daging ipun sampun kesampurnayang malih manut kawentenan pikobet ring pemargin Yuga kesejagatan. Manut pemargin polah palih ngesampurnayang inucap sampun manut pemarginyane sekadi ring sor :

1. Ring Rahina Redite, Umanis Ukir, Kalaning Purnama, sasih Kesange, Icaika 1908, Masehi 15 Maret 1987 Masehi, ngawentenan parikrama ngesampurnayang Awig – awig Desa Adat melarapan antuk Paparuman Prajuru Desa Adat sejangkepnyane, kesarengan antuk para sesepuh desa adat tur kehabih taler olih Sang awerat tur sane ngewikanin penyuratan Awig Awig.
2. Ring Rahina Redite, Kliwon Watugunung, Sasih Karo, Icaika 1924, Masehi 01 September 2002 Masehi, Ngawentenan parikrama ngesampurnayang Awig – awig Desa Adat melarapan antuk Paparuman Prajuru Desa Adat sejangkepnyane, kesarengan antuk para sesepuh desa, ngewah nguwhang susunan miwah daging Awig –Awig Desa Adat Adat Mengwitani.
3. Ring Rahina Saniscara, Umanis, Medangkungan kalaning Tilem, sasih Jiyestha, Isaka 1931, pinanggal bulan miwah warse masehi, Sabtu 23 Mei 2009, ring Pura Dalem Brerong, kacumponin tur kalingga tanganin antuk Bendesa Adat kesarengin Kelian Banjar Adat , kesaksinin Kelian Banjar Dinas sawewengkon Desa Adat Mengwitani.
4. Ring Rahina Redite, kalaning Sasih Sungsang warsa icaka 1937, pinanggal bulan miwah tahun Masehi 31 Januari 2016, ngawentenan parikrama ngesampurnayang Awig – awig Desa Adat melarapan antuk Paparuman Prajuru Desa Adat sejangkepnyane minakadi Prajuru Desa Adat Serahina rauh pengwantuannyane Kelian Banjar Adat sami sewewidangan Desa Adat Mengwitani, Sesepuh desa Adat sane pasikiannyane munggah ring Widya Sabha Desa Adat lan Kertha Desa Adat Mengwitani, tur kesarengan olih Dane Prajuru Piketan –Paiketan sane wenten ring Desa Adat Mengwitani , pacang nguwhang nguwhin susunan miwah daging Awig- Awig Desa Adat Mengwitani, sampun memargi gilik saguluk saha susrusa manggehang awig awig Desa Adat Mengwitani puniki sekadi ring Sor.



SARA - CITTA

OM SWASTYASTU

OM AWIGHNAMASTU NAMO SIDHAM

Desane mula pawakan I Krama Desa Adat rawuhing kulawarga pawongania. Manut dresta, Desane kaanggehang Bhuwana Agung, Pawongania sowang- sowang Bhuwana Alit. Adung patemon kang Bhuwana rwa kawentenane kahuripan sekala niskala larapan santhi jagaditha, sinanggeh prayojana pangriptaning Awig – awig. Desane sane kaanggehang Bhuwana Agung taler kaanggehang Bhawa mahurip jangkep saha Tri Hita Karania, lwire :

- a.PARHYANGAN : sahanan Kahyangan panyiwian Desa, genah ngarcana Hyang miwah tata caraning astiti ring Widhi, maka Atma Desa.
- na.PALEMAHAN : tanah kakuwuhan saha dagingnyane miwah tatacarania nabdab, pinaka Angga Sarira Desa.
- ca.PAWONGAN : Warga Desane sami miwah tata carania molah maprawreti, pawakan Bhayu Prawreti, Kandugi Desane sidha molah maprawreti.

Sajaba dresta inucap, Pamekas Pancasila, Undang –Undang Dasar 1945 miwah sahanan Peraturan-peraturan Pemerintah ring Negara Republik Indonesia tan maren manggeh kainggilang, tan wenang kalempasin antuk Awig –awig puniki.



DAFTAR ISI.

	HALAMAN
PEMABAH.....	01
SARA-CITA.....	02
Daftar Isi.....	03
SARGA I : ARAN LAN WAWIDANGAN.....	04
SARGA II : DASAR LAN PATITIS.....	05
SARGA III : SUKERTA TATA PAKRAMAN.....	05
Palet 1 : Indik Krama lan Warga.....	05
Palet 2 : Indik Prajura Desa Adat.....	09
Palet 3 : Indik Paruman.....	14
Palet 4 : Indik Kukul.....	15
Palet 5 : Indik Druwen Desa Adat.....	15
Palet 6 : Indik Karang Tegal lan Carik.....	17
SARGA IV : SUKERTA TATA AGAMA.....	21
Palet 1 : Indik Dewa Yadnya.....	21
Palet 2 : Indik Resi Yadnya.....	25
Palet 3 : Indik Pitra Yadnya.....	25
Palet 4 : Indik Manusia Yadnya.....	31
Palet 5 : Indik Bhuta Yadnya.....	32
SARGA V : SUKERTA TATA PAWONGAN.....	32
Palet 1 : Indik Pawiwahan.....	32
Palet 2 : Indik Sapihan.....	36
Palet 3 : Indik Sentana.....	37
SARGA VI : WICARA LAN PAMIDANDA.....	38
Palet 1 : Indik Wicara.....	38
Palet 2 : Indik Pamidanda.....	39
SARGA VII : NGUWAH NGUWUHIN AWIG AWIG.....	40
SARGA VIII : PAMUPUT.....	40



SARGA I

ARAN LAN WAWIDANGAN

Pawos 1

- (1). Desa adat puniki mewasta Desa Adat Mengwitani.
- (2). Jebar Kakuwub wawidangania mawates nyatur desa :
Sisih Wetan : Desa Adat Bringkit
Sisih Kidul : Desa Adat Kekeran
Sisih Kulon : Desa Adat Kelaci lan Dakdakan
Sisih Lor : Desa Adat Mengwi.
- (3). Kakuwub wawidangan Desa Adat Mengwitani manut dresta , lwire : Karang Paumahan, kaanggehang Palembang Desa Adat. Setra, Sawah, Tegal, Margi, miwah sakalwirnyane sejabaning Palembang Desa Adat, keanggehang Telajakan Desa.

Pawos 2

- (1). Desa Adat Mengwitani puniki kaepah dados lima welas banjar Adat, Lwire :
 1. Banjar Adat Culag–Calig.
 2. Banjar Adat Wira Dharma.
 3. Banjar Adat Sila Dharma.
 4. Banjar Adat Jumpayah.
 5. Banjar Adat Gunung Sari.
 6. Banjar Adat Taman Sari.
 7. Banjar Adat Batur Sari.
 8. Banjar Adat Delod Peken.
 9. Banjar Adat Loda Pura.
 10. Banjar Adat Dajan Peken.
 11. Banjar Adat Dukuh Gong.
 12. Banjar Adat Panca Dharma.
 13. Banjar Adat Panca Yasa
 14. Banjar Adat Panca Jaya.
 15. Banjar Adat Panca Warga.
- (2). Tiyosan ring Prajuru, bale banjar patut madruwe piranti – piranti minakadinia : Bale Banjar, Kukul, Palinggih, Awig- awig, Perarem – Perarem miwah sakalwirnia.
- (3). Awig- awig miwah Perarem-perarem sowang- sowang banjar wenang kakardi manut Desa Kala Patrania sowang-sowang, sakewanten tan wenang lempas napi malih tungkas ring awig- awig miwah Pararem Desa Adat tur taler kalingga tanganin olih kelian Desa Adat, maka pamikukuh kandugi dados linaksana.
- (4). Silih tunggil kepatutan ngawangun Banjar Adat Anyar mangde wenten kraman ipun sakirang- kirangnyane 45 kuren.



SARGA II

DASAR LAN PATITIS

Pawos 3

Desa Adat Mengwitani puniki nganggehang dasar :

- (1). Pancasila lan Undang- Undang Dasar 1945
- (2). Tri Hita Karana manut Tatwaning Bhuwana Agung.

Pawos 4

- (1). Lwir patitis Desa Adat Mengwitani, mikukuhang miwah ngajegang agama, nginggilang tata carane meagama, ngajegang kasukertan Desa miwah pawongan sami sekala niskala , ngajegang tata cara pangakaraning pawongan , pamekas sane ngiket pakulawangan , ngajegang kasukertan saraja berana druwen Desa. Cutet ipun ngardi Desa Adat Mengwitani sedaging- dagingnyane Kerta Tentrem Raharja.
- (2). Mangda tatujon Desa saha wargania sami presida kakeniang, patut pisan Awig-awig, pararem-pararem, kasungkeman, kalajerang tur kalaksananin olih warga Desa Adate sami miwah paswara –paswara wong katah lianan wenang kebaosang dumun ring paruman alit Prajuru Desa.
- (3). Asing-asing sinalih tunggil Krama lan warga mapikayun micayang piteket seperindikan polah palih pemargin Desa Adat Mengwitani , wenang kasungkemin olih Banjar Adat genah inucap utawi genah ring paguyuban inucap indik puniki kapidabdabang ring Perarem.

SARGA III

SUKERTA TATA PAKRAMAN

Palet 1

Indik Krama lan Warga

Pawos 5

Sane kabawos Krama lan Warga Desa Adat Inggih Punika :

- (1). Krama Desa Adat Mengwitani inggian punika , maka sami Pawongan sane keni swadharma indik ayah- ayahan , papesonan utawi peturunan miwah laluputan, diastun nyenek ring dura desa, sami punika kebaos Medesa Adat Mengwitani
- (2). Warga Desa Adat Mengwitani ,inggian punika maka sami Pawongane sane kapakusara Krama Desa Adat Mengwitani miwah keayomin olih Desa Adat ika, inggian yan magenah ring dura Desa, keanggehang Warga Desa.
- (3). Warga Tamiu Desa Adat Mengwitani inggian punika maka sami Pawongane saking dura Desa Adat Mengwitani sane nyenek ring Desa Adat Mengwitani sane tan kapakusara olih Pawos 5 pupuh (1), pupuh (2).
- (4). Tamiu Desa Adat Mengwitani inggian punika maka sami Pawonganne saking Dura Desa



sane nyenek ring Desa Adat Mengwitani laminnyane kirang ring 24 jam, sane tan kapakusara olih pawos 5 pupuh (1), pupuh (2), pupuh (3).

Pawos 6

- (1) Swadharma lan kawenangan Krama Desa Adat Mengwitani, Warga Desa Adat Mengwitani , Warga Tamiu Desa Adat Mengwitani, lan Tamiu Desa Adat Mengwitani sami, swadharmania lwire :
- i. Patut sungkem tur satinut ring Awig –awig , Perarem- Perarem Desa Adat Mengwitani,
 - ii. Satata ngutsahayang miara muah ngelastariang kabecikan Desa saha dagingnyane sami, inggihang dane wenten magenah ring dura Desa Adat Mengwitani.
- (2). Swadharmaning Krama Desa Adat Mengwitani, pateh sekadi swdharmaning warga Desa Adat, sakawenten maweweh antuk ayahan , papeson, utawi peturunan, laluputan miwah swadharma-swadharma sewosan manut dresta.

Pawos 7

- (1). Satunggil Warga Desa Adat sane polih tan polih nanggap karang Desa :
- i. Yaning sampun meperabian patut tedun dados krama Banjar Adat miwah krama Desa adat, tur keni ayah-ayahan muang papeson sawungkul,taler diastun punika ayahan Balu.
 - ii. Yan tan setinut wenang kenian- kenian punika katikelang ping kalih.
 - iii. Yan taler kantun tan setinut, wenang kasepekang salami tigang warsa prade tan wenten pengaksamania.
- (2). Satunggil sentanan I krama banjar sampun maparabian patut tedun makrama banjar muang makrama Desa adat ngawit selamin – laminnyane umanis Buda Keliwon Pahang , tur reramanyane wenang nyada mekrama Banjar muang Desa Adat kesinengguh dane Krama Pengele.

Pawos 8

- (1). Balu Luh wyadin Balu Muani sane sentanannia dereng maperabian wyadin kantun masekolah , yadiastun sentana balu , sakewentenan papeson tetep keni sawungkul.
- (2). Yaning I Balu puniki sampun ruyud wyadin sakit – sakitan patut :
1. Luput saking Ayah- ayahan sakewanten papeson keni sawungkul.
 2. Pungkuran yan sampun wenten sentanania wusan masekolah tur sampun taruna wyadin taruni ,patut tedun ngayah balu, sakewanten paturunan wyadin papeson tetep keni sawungkul.



-
-
- (3). Balu ngalisting, luh wyadin muani, keni ayah –ayahan balu, pepeson keni sewungkul. Yaning ipun sampun ruyud wyadin sakit-sakitan patut luput ring ayah –ayahan , sakewenten paturunan tetep keni sewungkul.

Pawos 9

- (1). Asing –asing warga Desa Adat sane kantun masekolah tur dereng maparabian wyadin makarya , luput ring ayah-ayahan. Indik papeson manut pararem prajuru Desa Adat.
- (2). Jatma alit ubuh meme bapa, luput ring ayah- ayahan miwah papeson. Yaning sampun mayusa 17 tiban sakewanten dereng maparabian keni ayah balu, paturunan sawungkul.
- (3). I warga Desa sane keni gering sane manut keterangan dokter wyadin tatimbangan prajuru Desa adat sakitnia daat mabuat tur mayanin wong lian sane metampekan , patut luput ayah –ayahan muang papeson , yaning ipun madruwe kurenan wyadin pianak sane sampun mayusa 17 tiban sakewanten dereng maparabian , wenang keni ayah balu , paturunan sawungkul .

Pawos 10

Yaning wenten I Krama Desa Adat sane tan jangkep ngelaksanin papeson miwah ayah-ayahan, wenang kapidanda manut pidabdabang ring pararem.

Pawos 11

Yening wenten wong saking Dura Desa Adat Mengwitani magenah ring Desa Adat Mengwitani, Parungguannia manut kahanan ,wiwenang lan swadharma , sekadi ring sor puniki :

- (1) Kapratama pisan , dane patut masadok dumun yin pacang nyenek lintangan 24 jam ring prajuru Banjar Adat genah dane ring wewidangan Desa Adat Mengwitani, prajuru Desa Adat muang dinas,jangkep ring surat –surat sepatutnyane , tur patut ragane sareng ngajegan pasukertan lan ngewantu sekancan pewangunan ring Desa Adat Mengwitani, tur dane inucap kesinengguh Warga Tamiu Desa Adat Mengwitani.
- (2) Yening dane Warga Tamiu Desa Adat Mengwitani inucap meagama Hindu, nyenek alungguh ring Desa Adat Mengwitani sangkaning medrebe tanah Pakubon utawi tanah tegalan kedudonin manut sekadi ring sor :
- i. Yaning melarapan antuk pekayun metu dane inucap pacang nyarengan me Desa Adat nyarengan nyungsung Tri Kahyangan Desa patut mangda makte ilikita saking Desa Adat nguwed, naur batu-batu nginutin Pararem Desa Adat Mengwitani , mepejati ring Kahyangan Tiga Desa Adat , tur selantur ipun swadharmanyane, wiwenangnia lan pengayomanyane polih pateh sekadi Krama Desa Adat Mengwitani.
 - ii. Yaning melarapan antuk pekayun metu dane inucap pacang nenten nyarengan me Desa Adat nenten nyarengan nyungsung Tri Kahyangan Desa patut nginutin Pararem Desa Adat Mengwitani sane mepaiketn ring awig –awig ,tur nenten polih penyangra setra



ring sewewidangan Desa Adat Mengwitani, nenten polih penyanggre ayah-ayah Adat saking Prajuru Banjar Adat lan Krama Banjar Adat taler ten polih penyanggra Ayah-ayah adat saking Prajuru Desa Adat Mengwitani, patut ragane sareng ngajegan pasukertan Desa Adat Mengwitani lan ngewantu sekancan pewangunan ring Desa Adat Mengwitani indik swadharma miwah wiwenangnia kapidadabang ring Pararem Desa Adat Mengwitani.

- (3) Yening dane Warga Tamiu Desa Adat Mengwitani setiyosan me agama Hindu , mangenah utawi nyenek alungguh ring Desa Adat Mengwitani sangkaning medrebe tanah Pakubon utawi tanah tegalan kedudonan manut sekadi ring sor :
 - i. Nenten kedadosang sareng nyarengan me Desa Adat Taler nenten dados nyarengan nyungsung Tri Kahyangan Desa santukan dane nenten meagama Hindu.
 - ii. Patut ragane sareng ngajegan pasukertan lan ngewantu sekancan pewangunan ring Desa Adat Mengwitani indik swadharma miwah wiwenangnia kapidadabang ring Pararem Desa Adat Mengwitani.
- (4) Yaning Warga Tamiu inucap lan wong dura Desa tiyosan medwe tanah carik ring wewidangan Desa Adat Mengwitani wenang setinut perindikan SKB Subak Tung kub Mengwi taler wenang naur punia prebiya Upakara ring Pura Penghulun manut munduk – munduk ring sejabag subak Tung kub Mengwi ring Desa Adat Mengwitani.
- (5) Satunggil krama Desa Adat Mengwitani sane meagama Hindu , ipun magentos agama tiosan (Islam, Kristen, Budha mwanng tiyosan), sakewanten :
 - i. Magenah ring karang ayahan Desa Adat Mengwitani, wenang dumun muputang polah palih swadharmaning sane kantun nunggak , nyukserahin tanah ayahan Desa inucap mewali ke Desa Adat Mengwitani utawi keambil olih Desa Adat Mengwitani ,nnten polih prebya (ganti rugi) tur tan dados malih ngelingan padruwen Bajar Adat lan Desa Adat taler ragane wusan nyarengan medesa Adat lan wusan nyungsung Tri Kahyangan Desa Adat Mengwitani.
 - ii. Nenten magenah ring karang ayahan Desa Adat Mengwitani, wenang dumun muputang polah palih swadharmaning sane kantun nunggak, nenten polih prebya (ganti rugi) tur ragane wusan nyarengan medesa Adat lan wus nyungsung Tri Kahyangan Desa Adat Mengwitani, tur kaesinungguh dane Warga Tamiu patut setinut ring Perarem Desa Adat Mengwitani.
- (6) Yening dane Warga Tamiu Desa Adat Mengwitani magenah utawi jenek alungguh ring Desa Mengwitani sangkaning kost / nyewa bulanan wenang nyungkemin tur satinut ring Awig- awig miwah dresta Desa Adat Mengwitani . Wiwenangnia polih pengayoman sepatutnyane manut kehanania saking Desa Adat Mengwitani tur patut naur punia manut pidabdab Perarem Desa Adat Mengwitani.
- (7) Sangkaning maubad, masekolah, petugas Negara maka miwah sakelwirnyane, swadharmanyane nenten kacutettan naur punia wantah malarapan sarwa ledang lascarya , patut ragane sareng ngajegan pasukertan mwanng Dresta Desa Adat Mengwitani, tur



wiwenangnya ,polih pengayoman saking Desa Adat Mengwitani manut sesidan Desa Adat lan kehanannia.

- (8) Yaning wenten Warga Desa Adat Mengwitani tan magenah ring Desa Adat Mengwitani utawi nyenek ring dura Desa Adat Mengwitani (merantau), patut sungkem tur satinut ring awig-awig mwang Dresta Desa Adat Mengwitani , patut medana punia ring sekancan pawangunan Desa Adat Mengwitani melarapan antuk sasuratan saking prajuru Desa , wiwenangnia ,polih pengayoman saking Desa Adat Mengwitani indik manut kehanannia, tur dane dados tan sareng ma Tri Kahyangan Desa Adat Mengwitani.
- (9) Asing-asing sane tan sungkem , tan satinutwyadin mamurug parindikane ring ajeng puniki sami , wenang kapidanda manut ring awig- awig lan pararem –pararem Desa Adat Mengwitani.

Pawos 12

- (1) Asing- asing Warga Tamiu setiyosan ring Agama Hindu pacang ngaryani Genah Ibadah diastun tanah inucap melarapan antuk numas utawi ngontrak utawi tiyosan patut polih persetujuan (kecumpuan) olih dane Krama Desa Adat Mengwitani sami melarapan antuk lingga tangan saking krama desa sami.
- (2) Satunggil warga Desa Adat Mengwitani patut ngeresepang tur nguningin sadaging pawos 11 lan 12 awig-awig Desa Adat Mengwitani puniki, mantuk ring dane sane pacang nerima warga tamiu inucap mangda keanggen sasuluh miwah panuntun kalaning maparilaksana sarahina-rahina olih warga tamiu inucap.

PALET 2

Indik Prajuru Desa Adat

Pawos 13

- (1) Dudonan Prajuru Desa Adat sane kebawos Prajuru serahina – rahina (Prajuru Harian) Desa Adat , inggiang dadudonnyane inggih punika :
 - a. Kelian Desa Adat
 - b. Petajuh Kelian Desa Adat (Wakil Kelian Desa Adat)
 - c. Sedahan (Bendahara)
 - d. Penyarikan (Sekretaris)
 - e. Penyade (Kesenoman) tigang diri
- (2) Prajuru *serahina* Desa Adat Mengwitani puniki patut mekarya sane jujur tur ngeutamang ngajegan pemargin awig- awig lan pararem mangde presida nuju pasukertan Desa Adat Mengwitani.



-
-
- (3) Sane dados kapilih kaanggen prajuru *serahina* Desa Adat wantah Krama Nguwed utawi Warga Nguwed Desa Adat Mengwitani sane jenek alungguh ring Desa Adat Mengwitani ngawit saking leluhur ipun.
- (4) Sane kebawos Prajuru Desa Jangkep inggihan punika : Prajuru Serahina Desa Adat , Kelian Banjar Adat , Prajuru lan utawi Angga Widya Sabha Desa Adat , Prajuru lan utawi angga Kertha Desa Adat , Kelian Dinas Sedesa Adat Mengwitani , Prajuru lan utawi Parekan Desa , Prajuru Pecalang lan utawi Angga Pecalang , Prajuru Paiketan Pemangku , Prajuru Shanti Desa Adat , Prajuru Serati Banten Desa Adat, Prajuru Pasraman Desa Adat , Prajuru Yowana Desa Adat , Kelian Setra sewewidangan Desa Adat mengwitani.

Pawos 14

- (1) Tiyosan ring prajuru serahina Desa Adat , taler patut kewangun Sabha Desa : inggihan punika ngadegan Widya Sabha lan Kertha Desa indik dedudonan ngadegan lan swadharmania kepidabdabang ring pararem Desa Adat Mengwitani.
- (2) Mangde presida midabdabang sekelwire Karya Yadnya ring Desa Adat ngewantu Prajuru Desa muputang yadnya inucap ,taler kapatutan kewangun Paiketan /Peguyuban mangda presida ngayah jangkep, taler masa pengewengkunyane manut paruman ring suang-suang paiketan inucap, sane dadudonannyane lan pekaryanyane kapidabdabang ring Perarem.
- (3) Manut sesidan-sidan kawentenan padruwen Desa Adat patut taler Sabha Desa Adat , lan paiketan-paiketan inucap polih uratian saking Desa Adat pinaka sukman Krama utawi warga, manut kewicaksanaan lan pemutus paruman Alit Prajuru Desa Adat.
- (4) Sedan Setra utawi Penghulu Setra ring wewidangan Desa Adat Mengwitani keadegan olih karma penngempon setra inucap kesahan olih Kelian Desa Adat , masa pengewengkuannyane manut pemutus paruma Krama pengempon setra inucap. Taler ngindikin Pemangku Mrajapati ring Setra inucap kesukserah ring Paruman Krama pengempon Setra inucap Prajuru Desa wantah nyaksian kemanten. Taler manut sesidan – sidan kawentenan padruwen desa Adat patut taler polih uratian saking desa Adat.
- (5) Dudonan Prajuru Adat Banjar sekirang – kirangne inggih punika :
- a. KELIAN ADAT BANJAR wyadin PATIS
 - b. PANYARIKAN
 - c. SEDAHAN BANJAR ADAT

Pawos 15

- (1) Swadharmaning Kelian Desa Adat :
1. Maridabdab prikahuripan ring Desa Adat Mengwitani serahina- rahina
 2. Nyangkepan tur nuntun pasangkepan Prajuru Desa Adat lan Krama Desa Adat manut pikobetnyane.



3. Nunutun tur maridabdab sakalwiring pakaryan ring wewangunan Desa Adat Makadinya :ring pura Kahyangan Tiga, Bale Krama Desa Adat , Wantilan miwah sane lianan kalaning ngawangun,ngayum , ngapahayu ,ngaci miwah sakalwirnia, taler Kelian Desa Adat manut abot pikobet acara utawi pekaryan inucap , wenang ngadegan Prawetaka Karya manut Perarem Desa Adat Mengwitani.
 4. Nibakan dewasa ngutang sawa , malarapan antuk penghulu utawi Sedan Setra sowang-sowing
 5. Ngilikita saraja brana druwen Desa Adat tur mengakusara pemarginyane lwire : witnyane, katahnyane, penelasannyane, kahanannyane, mangkin miwah salantur ipun , kaduluran antuk likita sapatute, inggihan raja brana punika marupa jinah inggihan marupa barang- barang sewosan , melarapan antuk ayah swadharmaning Prajuru serahina. Indika puniki patut kawedar ke banjar-banjar nyabran warsa , inggih punika rikala mapag wyadin sesampun panyepian , malarapan antuk sasuratan sane kalingga tangain Prajuru Desa Adat sami manut swadarmania tur nyadokang dane Widya Sabha Desa Adat
 6. Nyuratang katah krama Desa Adate saha kania sowing – sowing
 7. Nyuratang wawangunan- wawangunan Adat ring sawawidangan Desa Adat Mengwitani, lwire pura- pura Setra , pasiraman miwah sakalwirnia saha kania miwah pengamong miwah pemaksania sowing- sowing
 8. Muput wicara – wicara ring sejeroning prikahuripan sane metu ring Desa Adat Mengwitani. Umpaminia : Pawiwahan, Pikobet mapikuren , miwah pikobet krama lan Warga sane tiyosan.
 9. Kelian Desa Adat kesarengan antuk Prajuru sewosan patut ngeruruh utawi ngerincian sumber- sumber dana diastun saking Pemerintah utawi taler ngewangun Usaha Unit Desa sane Anyar taler ngeruruh potensi ekonomi sane wenten ring Wewidangan Desa Adat.
- (2) Wiwenang Kelian Desa Adat :
1. Wenang maruruh – ruruhan wyadin nyangkreb lan nunjuk silih sinunggil krama utawi warga, barang – barang marupa tatanduran , ubuh- ubuhan miwah barang- barang sewosan sane manut , pacang keangge ring wawangun wyadin upakara Desa Adat , upamin ipun : tataruan, gedebong , bawi butuhan , ayam miwah sane lian-lianan sane manut , tur barang –barang punika kataur sapatute ,nanging tan wenang nyangkreb lintangan ring asiki . Yaning sane madruwe tulak, wenang kapidanda sepengarga barange sane ayat kasanggrep inucap.
 2. Wenang nombang silih nunggil Krama Desane wyadin kulawargan ipun , nampi dunungan, yaning kapikayun oilh pararem prajuru serahina Desa Adate sane madunungan punika prasida ngawetuang huru hara pasukertan wyadin katentraman Desane . Sang sane mamurug , wenang kapidanda manut pararem prajuru Desa Adate manut abot dangan wicarannyane.
 3. Wenang taler muputang wicara parindikan purane sami sawawidangan Desa Adat Mengwitani yadiastun punika pura-pura pamaksan wyadin pepeletan, yaning prajuru



wyadin pangempon pura inucap tan sidha muputang wicarannia tur wicara punika kasadok ring Kelian Desa.

4. Kelian Desa Adat lan Prajuru Jangkep sami ritatkala masa pangewengkuan Widya Sabha lan Kertha Desa Adat Mengwitani Sampun telas , wenang ngadegang Widya Sabha lan Kertha Desa sane anyar melarapan antuk paras paros sarpanaya.
5. Kelian Desa Adat ritatkala peparuman Prajuru Desa Adat wenang utawi kedadosang ngrauhang Pejabat Dinas minakadi Perbekel lan Kelian Banjar Dinas sewewidangan Desa Adat Mengwitani manut pikobet daging Peparuman Inucap.
- (3) Swadharmaning lan Wiwenang Widya Sabha (Sebagai Lembaga Perwakilan dan Pertimbangan) Desa Adat Mengwitani ngicenin tetimbangan ring Kelian Desa Adat tur nuriksin pemargin saha artha brana padruwen Desa Adat sane keakusara utawi kemargiang olih Kelian Desa Adat Mengwitani . Sejangkepnyane swadharmaning Widya Sabha kapidabdabang ring Perarem Desa Adat Mengwitani.
- (4) Swadharmaning lan wiwenang Kerta Desa (sebagai Lembaga Pasukertan) Desa Adat Mengwitani Ngemedalang pemutus pemuput manut pamidanda sane munggah ring Awig-awig Desa Adat Mengwitani , rikalaning sinunggil Krama utawi Warga sane langgana utawi memurug ring Pemargin Awig – awig lan Perarem-perarem Desa Adat Mengwitani. Sejangkepnyane swadharmaning Widya Sabha kapidabdabang ring Perarem desa Adat Mengwitani.

Pawos 16

- (1) Paolih – olihan kelian Desa Adat , manut kahanan miwah kasidhan Desane.
- (2) Piolih olih Dane Prajuru Desa serahina setiyosin ring Dane Kelian Desa Adat lan Prajuru Banjar adat manut sesidan kahananin padruwen Desa Adat kapidabdabang manut perarem,
- (3) Para Prajuru Serahina (Prajuru Harian) Desa Adat mwang banjar Adat luput ring paturunan, sakewanten tetep keni ayah –ayahan riantukan pacang ngenterang karya.
- (4) Indik sekancan leluwatan inucap wenang kepastikayang melarapan antuk pidabdab ring pararem Desa Adat Mengwitani.

Pawos 17

- (1) Kelian Desa Adat miwah Prajuru Desa Adat sawosan kapilih miwah kahuwusang olih pararem Krama Desa Adat melarapan pawilangan swara dua pah telu saking swaran krama sami.
- (2) Sakancan Upacara mwang upakara pamisekan Prajuru Desa Adat miwah para Mangku Tri Kahyangan kategen olih Krama lan Warga Desa Adat sami.
- (3) Masa Pengewengkuan kelian Desa Adat miwah Prajuru Desa Adat sewosan, laminnyane limang warsa , sajawaning wenten prindikan-prindikan sane dahat manesek.



- (4) Masa pangawengkuan Kelian Banjar Adat miwah Prajuru Banjar Adat sewosan , suwennyane tigang warsa , sajawaning wenten parindikan- parindikan sane dahat menesek.
- (5) Kelian Desa Adat miwah Prajuru Desa Adat sewosan yaning sampun telas masa pangawengkuan, wenang pilih malih , yaning huwusannyane punika melarapan huwusan saking singgih. Yaning dane huwusan wyadin kehuwusan saking nista, tan wenang kapilih malih selamin – lamin nyane.
- (6) Kelian Desa Adat miwah Mangku Tri Kahyangan yaning seda wyadin lina , I Krama Desa Adat sami patut mapunia manut pararem.
- (7) Kelian Desa Adat , Petajuh, Penyarikan, Sedahan, lan kesinoman kalaning huwusan ngawengku sangkaning singgih , patut keaturin pasangon manut sesidan sidan padruwen Desa Adat Utawi kapidabdabang ring pararem.
- (8) Kelian Desa Adat sareng Prajuru Serahina tiyosan , Widya Sabha lan Kertha Desa Adat kalaning huwusan ngawengku sangkaning singgih , patut mesadok ring Krama Desa Adat melarapan ring Paruman Jangkep Prajuru Desa Adat , eman sasih sedurung telas masa pengewengkunyanane.
- (9) Indik pidabdab Pengewengkuan lan Ngadegang Prajuru Serahina , Widya Sabha Desa Adat lan Kertha Desa Adat kapidabdabang ring Pararem Desa Adat Mengwitani.

Pawos 18

Para prajuru Desa Adat serahina miwah Para Prajuru Banjar Adat dados wyadin patut huwusan ngewengku amongania, yaning sangkaning :

- (1) Sedha.
- (2) Mamitang raga sankaning becik –becik , huwusan saking singgih.
- (3) Kahuwusan sangkaning becik –becik riantukan mabukti tan sidha ngelaksanayang swadharmannyane sapatutne, umpamine : mayus , tan lingu, sakit – sakitan miwah sakalwornia sane ngranayang polah para wretin Desa Adat miwah Banjar Adate kadat wyadin santul. Huwusan puniki taler kantung keanggehang huwusan saking singgih. Yan dane tan satinut dane wenang kahuwusang sangkaning papaksaan , mawastu huwusannyane saking nista.
- (4) Kahuwusan saking nista riantukan mabukti malaksana tan rahayu, umpami keni pidana penjara saking Pemerintah sangkan ngelaksanayang pelanggaran wyadin kejahatan keanggen ring paduwekannyane ndiri , ngabengan padruwen Desa Adat, elon-elon kalaning mamutus wicara , paradara budhi, ngapak- apak, tan lingu ring paswaran wong katah , miwah sekancan laksana duskerta sewosan.
- (5) Indik nguusnia sakadi puniki patut kadulurin antuk pamidanda tur kegentosan manut pidabdab sekadi pararem.



Pawos 19

- (1) Yaning wenten I Krama Desa Adat Mengwitani matilar saking Desa Adat Mengwitani pacang jenek alungguh ring genahe sewosan :
 1. Pinih riyin ipun patut mesadok ring Kelian Adat Banjar miwah Kelian Desa Adat Mengwitani.
 2. Hutang- piutang miwah wicara – wicarania ring Banjar miwah ring Desa Adat patut puputang wyadin tinasin dumun.
 3. Nenten polih bagian punapa-punapi druwen Banjar Adat miwah Desa Adat.
 4. Yan ipun madruwe , padruwen dreben ipun dewek sane patut minakadinia entik – entikan , ubuh –ubuhan , umah, carik, miwah sane lian –lianan ipun wenang kantung ngelingin wyadin ngadep sakahharep ipun.
 5. Karang Desa sane genahin dane pecak , kaambil malih antuk Desa Adat .
 6. Kelian Banjar Adat miwah Kelian Desa Adat wenang ngicening surat keterangan sepatutne.
 7. Sadurunge dane matilar dane patut mapamit dumun ring Tri Kahyangan.

- (2) Malih pidan yaning sang sane matilar puniki malih mewali pacang magenah alungguh ring Desa Adat Mengwitani , wenang kawentenan tan dados kantung ngelingin karang wyadin tanah Desa Adat genah dane pecak , tur dane patut sungkem miwah satinut ring awig mwang Dresta Desa Adat Mengwitani.

Palet 3

Indik Paruman

Pawos 20

Paparuman ring Desa Adat Mengwitani ke pah lwire :

- (1) Paruman Alit , kawentenan wantah olih Prajuru serahina – rahina (Prajuru harian), nyabran sagalah- galah manut kabuatannia.
- (2) Paruman Madya , kawentenan olih Prajuru Jangkep nyabran rikalanin wenten pikobet sane mabuat pisan perindikan Pekaryan ring sejeroning Desa Adat mengwitani , dedudonannyane kapidadabang ring Perarem .
- (3) Paruman Agung (Sabha Desa) Krama Desa kewentenan olih Krama Desa sami yening pekobet sane tan presida kepuputin olih Paruman Alit lan Madya.
- (4) Parum Banjar Adat , kawentenang ngasasih apisan , wyadin segalah –galah manut kabuatnia.
- (5) Paruman ring sejeroning paiketan / Peguyuban , kewentenang segalah-galah manut kabuatnia.



Pawos 21

- (1) Sapa sira ugi sane kapatut tan nyarengin paruman , wenang keni dosa sekadi pararem.
- (2) Sane tan wenang keni dadosan yaning tan ngayahin paruman, sekancan sane mapuangkid wyadin masadok ring I Prajuru.
- (3) Dasar puangkide sane patut, kapademan, kaluasan, tugas Pemerintah, miwah kaabotan – kaabotan sewosan sane manut.

Pawos 22

Daging peparuman kaanggep kapatut ,yaning sampun kecumponin antuk kanistania kalih pah tiga katah swarane sane ngarawuhin . Sane ngarawuhin , sanistania kalih pah tiga kramane sami.

Palet 4

Indik Kukul

Pawos 23

- (1) Mungging swaran kukul kadi ring sor :
 1. Kalaning wenten Upakara ring Pura : gendongan nungtit ngelantur.
 2. Pacalang makarya wiadin pacang paum : nganutin dresta saking kuna.
 3. Yaning madrebe pianak : 2 kelentung banban
 4. Yaning ngerorod : 3 kelentung banban
 5. Yaning padem : 5 kelentung banban
 6. Kapanca bhaya :
 - a. Kapuwunan : Bulus ngelantur tanpa pegatan , sawatara 5 menit . Yaning sampun aman, wenang malih swaranebanban kelen , tung – kelentung.
 - b. Anak ngamuk : Bulus 2 tulud . Yaning sampun aman, swaran malih banban kelentung- kelentung
 - c. Perampokan, maling miwah salawirnia : bulus tigang tulud . Yaning sampun aman malih swarayang banban kelentung- kelentung.
 - d. Bhayabtaka, umpami kerubuhan, anyud miwah sakalwirnia : atulud bulus. Yaning sampun aman malih swarayang kelentung- kelentung banban.
- (2) Swaran- swaran kukul Kapanca Bahya (pakewuhe) puniki sami patut kasawurin olih kukul banjare sami, tur I Krama Banjar sami patut medal matulungan makta gagawan sane manut ring kahanan pakewuhe.

Palet 5

Indik Druwen Desa Adat

Pawos 24



Padruwen Desa Adat Mengwitani kadi ring sor puniki :

- (1) Pura Kahyangan Tiga (Pura Desa, Pura Puseh, Pura Dalem lan Pura Penataran) lan palawatan jangkep sakalwirnia.
- (2) Karang Desa Adat
- (3) Palaba-palaba Desa Adat
 - i. Laba Pura Desa Mengwitani : SKPT No.1068/ 1985 linggah nyane 1,790 m² magenah ring Subak Tungkub Mengwi Munduk Babadan Br. Pupuan.
 - ii. Laba Pura Desa Mengwitani : SKPT No. 1069/1985 linggah nyane 2.200 m² magenah ring Subak Tungkub Mengwi Munduk Babadan Br. Pupuan
 - iii. Laba Pura Desa Mengwitani : SKPT No.1071/1985 linggah nyane 3.260 m² megenah ring subak Tungkub Mengwi Munduk Babadan Br. Pupuan
 - iv. Laba Pura Desa Mengwitani : SKPT No.1070/1985 linggah nyane 1.625 m² megenah ring Subak Tungkub Dalem Lanyahan Desa Kekeran , Daweg tahun 2008, SKPT No 1070/1985 kesiluran dados sertifikat No : 2407, seluas 185 m² sane magenah ring Dauh Bale Kulkul Pura Dalem Brerong dados Jaba Pisan Pura Dalem Brerong lan sertifikat No. 2409 , seluas 1.910 m² sane magenah ring Baler Pura Dalem Brerong Dauh Pura Alas Arum.
 - v. Tanah genah Pura Alas Harum sawatara luasipun 250 m²
 - vi. Tanah pecak genah Pura Pesucian Kahyangan Tiga Desa Adat Mengwitani linggahnyane kirang langkung 250 m² megenah ring wewidangan Banjar Dajan Peken (ring dauh Pancoran Umum Banjar Adat Dajan Peken)
- (4) Setre empat pelebahan, kadi ring sor :
 - i. Setre palemahan Pupuan linggah nyane kirang langkung 9000 m²
 - ii. Setre palemahan Gunung Sari ring Br.Gunung Sari linggah nyane kirang langkung 4200 m²
 - iii. Setre palemahan Nyuh Gading
 - iv. Setre palemahan Lebah lan Br. Batur Sari.
(Setre palemahan Nyuh Gading lan Setre palemahan Lebah ring Br. Batur Sari linggah nyane kirang langkung 10.000 m²)
- (5) Piranti – piranti Desa Adat, lwire :
 1. Sakalwiring wawangunan ring Pura Dalem mwanng Mrajapati.
 2. Sakalwiring wawangunan ring Pura Desa mwanng Puseh.
 3. Sakalwiring wawangunan ring Pura Penataran .



4. Wawangun – wawangunan Druwen Desa Adat sewosan , minakadinia Pesucian (Pura Pesucian) Kahyangan Tiga sane megenah ring wewidangan banjar adat dajan peken, Pasiraman ring Pura Dalem Gede sane megenah ring wewidangan Banjar Batur Sari, Bale Desa sane magenah ring wewidangan Banjar Loda Pura, Pura Alas Harum sane wenten ring wewidangan Pura Dalem Gede Brerong , miwah sane lian-lianan sane sampun ketah kaanggehan druwen Desa Adat.
5. Sehananin Usaha Unit Desa Adat inggian punika :
 - i. LPD (Lembaga Perkreditan Desa) SK Gubernur No. 172 Tahun 1984 lan SK Bupati No. 1078 Tahun 1988 megenah ring Desa Adat Mengwitani.
 - ii. Pasar Adat “Mertha Sari Sedana” muah sane tiyosan kapidadabang ring Perarem Desa Adat.

Palet 6

Indik Sukerta Pamitegep

Kaping 1

Karang, Tegal Lan Carik

Pawos 25

- (1) Karang Desa Adat inggih puniki sakalwiring Karang Druwen Desa Adat , diastun sane kegambel Antuk Krama kebaos Tanah Ayahan Desa wiyadin karang tanah sane ta medaging Krama Warga , manggeh taler iriki tanah –tanah palaban , rurung –rurung lan telanjakan.
- (2) Sakalwiring tanah wyadin Karang utawi Tanah druwen Desa Adat , tan pisan dados gadeang , singkuhang , pasilihang, miwah adol, yadiastun majalaran saking singid pisan , upami saking dalih ngadol papayon miwah sakalwirnia , sejawaning sampun kaingkupan olih Krama lan Warga Desa Adate. Yaning tanah punike samatra keambil olih Desa Adat kumantos wicaranya patut.
- (3) Yaning wenten saking tanah Desa Adat utawi karang padruwen Desa Adat , polih paoli oliv saking pemerintah , minakadinnia ganti rugi , ngotrakan tanah miwah ngontrakan pewangunan patut paoli oliv puniki keatur ke Desa Adat akehnyane manut kapidadabang ring perarem.
- (4) Yaning wenten Warga Tamiu Desa Adat Mengwitani lan wong dura Desa Adat Mengwitani mekarya usaha , yadin sampun madwe usaha magenah ring wewidangan Desa Adat Mengwitani , patut manut ring Peraturan Pemerintah Republik Indonesia patut sungkem tur satinut ring awig- awig mwng Dresta Desa Adat Mengwitani, patut sarwa ledang medana punia ring sekancan pawangunan Desa Adat Mengwitani diastun melarapan antuk kesuratan olih Prajuru Desa Adat Mengwitani kapidadabang ring Perarem Desa Adat Mengwitani . Wiwenangnia polih pangayoman saking Desa Adat Mengwitani sepatutnyane.



-
-
- (5) Asing – asing wenten Krama lan Warga Desa Adat Mengwitani , warga Tamiu Desa Adat Mengwitani lan wong dura Desa Adat Mengwitani ngadol tanah pekarangan lan tanah carik ring wewidangan Desa Adat Mengwitani taler ngewentenan alih fungsi tanah carik , wenang dane sane ngadol lan sane pacang numas taler sane pacang ngalih fungsi inucap, diastun pacang kawigunan anggen peumahan kaplingan wenang mepunia manut kapidadabang ring Perarem Desa Adat Mengwitani, taler ring SKB Pekaseh Subak Tungku Mengwi.

Pawos 26

- (1) Sane kapatutan nyaladiyinin ayah tur nongosin karang wyadin tanah Desa Adat punika, wantah pianak waris sang nanggap pecak , yan tan wenten , dados pianak nyama tugelannya sane sareng ngewaris iriki, yan tan wenten dados pianak misania saking purusa ,yan tan wenten ,selantur ipun kadabdab olih Banjarnia wyadin Kelian Desa Adat.
- (2) Sakawentenan mangda sami pamargi nyaladiyinin ayah puniki masulur sepatut ipun , kasaksinin olih kadang wargania sami, kapikukuh olih Kelian Adat Banjar, Kelian Desa Adat miwah sane sewos- sewosan sepatut ipun , majaran antuk eka likita sepatute sane pacang kakaryanang olih Kelian Desa Adat .
- (3) Yaning wenten palaksanaan wyadin parindikan karang wyadin tanah Desa Adat Sane gabeng wyadin nyabenang , patut Prajuru Desane Nuruksain sebecik –beciknyane, tur raris mamutus wicaranyane manut Peparuman Prajuru Jangkep Desa Adat Mengwitani.

Pawos 27

- (1) Indik Pawatesan wyadin panyengker Pakarangnya ring Desa Adat Mengwitani , makaran Hulu wyadin magagalengan , kangin miwah kaje, artin ipun , sang madruwe pakarangan puniki patut ngawangun, ngupapira tur ngapahayu , pawatesan wyadin panyengker punika sane magenah sisi kangin miwah kaje pakarangannyane, marupa pagehan , marupa tembok miwah sane lian –lianan.
- (2) Yaning pekarangan puniki sisi kelod miwah sisi kawuhnyane makadian ring rurung , Patut sang madruwe pakarangan punika taler ngawangun , ngupapira tur ngapahayu penyengker puniki.
- (3) Satungil pacang makarya penyengker , patut mapitahu wyadin makruna dumun ring sang ngadinin, Kelian Banjar Adat. Yaning makadin sareng rurunge, patut nunas lugraha dumun ring Kelian Desa Adat , riantukan rururnge ketahnyane maparungguan rurung Desa Adat, sajawaning margi agung , tur linggah rurung punika manut ring pakarsan Kelian Desa Adat. Sane mamurug , wenang panyengker sane kawangun punika karombak wyadin kagubar.

Pawos 28

- (1) Karang Desa apelebahan yaning keedum malarapan antuk pagehan , tembok wyadin panyengker sewosan , sanistania patut ngaryanin genah pamarajan wyadin Karang suci, mangda paedum karange sane medasar antuk Tri Hita Karana puniki prasidha memargi sepatutnia.



-
- (2) Yaning pekarangan paumahan sane kabengbeng , inggih punika karang paumahan sane tan wenten pamedalannia :
 1. Linggih Patut I Kelian Desa Adat nabdab mangda karange punika prasadha polih margi pamedalan , majalaran antuk numbas , nunas, nyilurin miwah sane lian –lianan.
 2. Margine punika adepa agung, sanistania ammeter.
 3. Sang sane tulak , wenang kapidanda merupa denda seageng- agengnyane tikel ping kalih panghargan margine punika , margine inucap tetap kewentenan .
 - (3) Sakalwiring pangutangan toyan sabeh ring satunggil pakarangan, patut manuju karurung wyadin jalinjingan pakraman.
 - (4) Sakaluwiring toyan cacapan tan wenang nibenin pakarangan anak sewosan wyadin rurung pakraman.
 - (5) Mangda kabuatan ida dane sane pakarangannyane tegehan tegaknyane , asing – asing sang madruwe pakarangan sane pakarangnia endepan genahnia , patut nampi sajeroning pakarangannyane , maka sami toya sane ngembang dewek, nenten saking ekan –ekan manusa , meembah saking pakarangan ida dane inucap.

Kaping 2

Papayonan Pawos 29

- (1) Sakalwiring entik – entikan sane mentik pastika ring penyengkere , sane nruwenang entik – entikan punika sang sane makarang hulu ring panyengkere punika.
- (2) Yaning wenten entik –entikan mentik ring silih tunggil pakarangan sakewanten entikan ipun mepet wyadin nagek ring penyengker karang hulu pakarangan sewosan , entik – entikan punika patut kadruwe antuk sareng kalih. Yaning indike punika ngawetuang wicare, wenang desane nyangkreb entik- entikan punika, kaepah tiga , sane mawiare sowang – sowang polih aduman , sane malih kaambil antuk Desa Adat.
- (3) Sakalwiring entik –entikan sane sampun ketah ageng punyan ipun pacang lintangan ring alangkat kalih nyari , Agung wyadin satak salawe sentimeter saking panyengker pekarangan inucap. Yan tan satinut , wenang kapidanda lwire :
 1. Patinget saking Kelian Desa Adat mangda entik – entikan puniki kagingsirang. Yan tan satinut , wenang kapidanda selantur ipun.
 2. Kelian Desa Adat wenang ngerereh buruh pacang ngebah wyadin ngabut entik – entikan inucap.
 3. Entik – entikan sane kagingsiran puniki kantung kadruwen olih sang madruwe pecak , sakewanten dane patut nawur ongkos buruh sepatute, saha pidanda marupa denda sekadi pararem.Maka sami pemargi pangingsiran puniki patut kapahayu sapatut ipun.

Pawos 30



-
- (1) Yaning wenten entik – entikan sane naonin wyadin ngekep karang wyadin wawangunan wong lian :
 1. Pinih riyin sang kataonin, patut mapitenget becik- becik ring sang druwe entik – entikan, mangda entik – entikan punika katotor wyadin kagingsiraang sepatutnyane.
 2. Yaning ngantos ping tiga patingete tan kalaksanain , sang keberatan patut masadok ring Kelian Banjar Adat miwah Kelian Desa Adat.
 3. Sang sane kasadokan , wenang nibakang sepat gantung ring entik – entikan punika, inggih punika, entik – entikane punika katotor kumantos muncuk carangnyane sane sampun matotor yaning dagingin sepet gantung rawuh ring tanahe nenten ngalintangin tegh – tegh penyengkere.
 - (2) Tepengan puniki manggeh taler indik rurung wyadin margine sane kataonin wyadin kakekeb olih entik- entikan.
 - (3) Yaning wenten papayon sane ageng, umpami : punyan nyuh , bunut,jaka, miwah sakalwirinia , sane genahnyane mentik nyalah bikas wyadin ngelikadin tur mayanin , sapisira ugi manggihin , patut sagalisa mapitahun ring Prajuru Banjar Adat wyadin ring Prajuru Desa Adat I Prajuru puniki patut digelis nuraksanin ke genahe punika. Yaning manut tatimbangan Prajuru – Prajuru puniki , kayu punika sayuwakti ngalikadi wyadin mayanin kalaning wenten angina baret wyadin sangkaning ipun berek , I Prajuru patut ngandikayang mangda kayu punika sagelise kaebah wyadin kagingsirang olih sang madruwe. Yaning ngantos ping tiga kapatinget nenten kalaksanin, wenang taru punika kaebah olih warga banjare , tur taru wyadin sangnyane kadruwe olih banjar inucap.

Pawos 31

Yaning wenten anak ngarusak wawangunan , entik – entikan miwah sane lian –lianan,malarapan antuk mamaling , ubuh –ubuhan , laran sane lianan, yadiastun sangkaning ngelap wyadin nenten ngelap :

1. Patut sang lumaksana wyadin sang angakusara panangkan rusane keni pidana marupa : ngapahayu karusakan – karusakan inucap mangda mawali kadi jati mula.
2. Ngawehin pangawalian marupa barang – barang wyadin jinah ring sang karusakan pinaka pangentos pocol.
3. Ring I Maling patut kasukserahang ring sang angawerat. Yaning sang sane kawarah tan satinut , negung wyadin masuksrahang ring sang angawarat .

Kaping 3 Indik Wewalungan

Pawos 32

- (1) Tan dados ngalumbar buron ubuh – ubuhan.
- (2) Sang mamurung , wenang kapidanda marupa :



1. Patinget ping tiga , yan tan kalaksananin, sang keberatan wenang masadok ke Kelian Banjar Adat miwah Kelian Desa Adat.
2. Yaning ngantos ping tiga pangawarah Prajurune puniki tan kalaksanin, wenang buron puniki kapintet olih Kelian Banjar Adat miwah Kelian Desa Adat, tur kaserahang pamiarane ring sang keberatan , selaminyane tigang rahina.
3. Yaning sejeroning tigang rahina puniki sang adruwe ubuhan puniki mamanan ngambil ubuh – ubuhannyane, dados sakewanten dane patut kasarengin sanistania olih Prajuru Banjar Adat , tur ipun patut keni pidana marupa danda sekadi pararem.
4. Yaning sejeroning tigang rahina piniki tan wenten anak ngambil ubuhan puniki , wenang ubuhan punika kaambil olih Desa Adat , kaanggehang ubuhan tan wenten sane nruwenang.

Kaping 4 **Indik Panyanggran Banjar**

Pawos 33

- (1) Rikala ngawangun yadnya suka dhuka, wenang nunas panyenggran Banjar, manut Banjarnia sowang – sowang.
- (2) Penyenggran Banjar sane kamargiang , manut dresta miwah pararem Banjare sowang – sowang, manut panglogika agung alit karya, tur katureksain olih Prajuru Bannjar inucap.
- (3) Yaning wenten karya yadnya sane ageng sane rumase tan siddha keambil olih banjar adat asiki , Banjar Adat puniki wenang nunas tulungan ring Banjar Adat sewosan sapatutne.

SARGA IV **SUKERTA TATA AGAMA**

Palet 1 **Indik Dewa Yadnya**

Pawos 34

- (1) Para Mangku Kahyangan tiga, Para pandita wyadin sang sane madwi jati wyadin meraga putus ring Desa Adat Mengwitani, luput ayah- ayahan mwah paturunan. Yan wenten Santanania sampun maparabian asiki, Santana puniki taler kanton luput , riantukan nyaladiyi. Yaning wenten malih santanania maparabian, wenang keni swadarma krama sepatutne minakadinia keni ayah –ayah mwanng papeson sawungkul.
- (2) Para Mangku Papeletan sami, luput ring peturunan utawi papeson ke Desa Adat rikalaning Palisan kewanten.



-
-
- (3) Pah – pahan Sarin Canang Aturan ring Piodalan Kayangan Tiga lan Pelisan ke pah manut pidadab ring Perarem Desa Adat. Sesari canang aturan rahina tiyosan punika katur ring dane pemangku sane ngamong kahyangan punika.

Pawos 35

Swadharmaning Sang Para Pemangku minakadinyane :

- (1) Patut tan maren ngutsahayang raga mapikayun, mabawosan, tur maparilaksana sabecik – beciknyane lebihan ring warga Desane sewosan, inggihan ring pakurenannia sowang-sowang , inggihan ring jabatan ,tan wenang mamotoh, mamunyah , prakata, paradara miwah duskeretane sewosan.
- (2) Tan marem malajah , boyaja indik tata cara ngemargiang upakara kewanten, sakewanten taler indik paridadab upakara, dudonan upakara miwah lian –lianan.
- (3) Kalaning ngamargiang Upakara tan dados lintang mangetik, kakirangan – kakirangan upakara sane sikut dados antuk ngaksamaang kaluwur , mangda kamargiang kewanten , riantukan tan wenten kasampurnan ring jagate.
- (4) Kalaning pacang ngamargiang Upakara tan dados pilih kasih.
- (5) Ngaryanin aturan –aturan satunggil purnama, tilem, kliwon, miwah rerainan – rerainan sewosan sane manut.
- (6) Ngaraksa saha ngupapira pralingga – pralingga, patapakan, busana, miwah pirantin – pirantin pura sewosan.
- (7) Ngamargiang Upakara miwah Upacara ring Pura amongania sowang – sowang , miwah ring pakubon krama sewosan pradane katuwur.
- (8) Mareresik ring pura tur tan maren ngalajerang kasucian Pura.
- (9) Swadharman Pamangku selanturnyane, mangde nelebang cakepan katatatwaning kapamangkuan.
- (10) Yaning wenten silih tunggil Pamangku Tri Kahyangan sane kapiambengan rikalaning ngamargiang Upakara , pakaryania wenang kasaladiyi olih Pemangku Tri Kahyangan sewosan.
- (11) Pemangku Kahyangan Tiga lanang istri tan keneng kecuntakang, yan prade dane majenukan ring keumah sang kalayu sekar tan sangkaning wenten paiketana pakulawrgan sakewanten ngambil pekaryan manut dedunan kepemangkuan, Yan prade sane kalayu sekar inggiang punika pakulawraga purusa ngarep, ring tunggal natah lan pewaregan taler abot sesel sungsut ring pekayun patut pemargiane ring Pura amongania keseledininn Pemangku Kahyangan Tiga Tiyosan.

Pawos 36

- (1) Wong kacuntakan, gering mabuat , buduh, mamunyah, marebat, manemah, mamisuh, miwah sakancannyane, tan wenang ngaranjangan ke Karang suci, minakadinia ka pura – pura. Sang sane mamurung wyadin sane ngaku sara dane, wenang kapidanda sekadi pararem.
- (2) Yaning wenten anak mayusa lintang ring 24 weton mabacin wyadin makotoran ring karang suci minakadinne Pura – pura, wong inucap wyadin sane ngaku sara ipun, wenang kapidana sekadi pararem.



- (3) Yaning wenten anak mamuat sawa wyadin babangkan sane tan manut indik ke Karang suci minakadinne Pura – pura, wenang kapidanda sekadi pararem.
- (4) Yaning wenten wong masanggama ring Karang suci minakadinne pura- pura, wong inucap wyadin sane ngaku sara dane wenang kapidanda sekadi pararem.
- (5) Satunggil ngaranjing ke Karang suci minakadinia Pura –pura, patut mapangangge adat sepatutnyane manut Desa kala Patra duk punika utawi manut abot acara sane kewentenan ring genah suci inucap. Sang mamurung , wenang kapidanda marupa : Patinget sangkaning becik –becik, yan ipun tan satinut , wenang kapidanda sekadi pararem.

Pawos 37

- (1) Yaning wenten ring karang suci minakadinne Pura – pura anak maparilaksana kumanti ngawetuang rah jadma tur ngetel ke palemahan Karang suci punika, taler yaning wenten sane kumantos padem, inggihan sangkaning ngelap, sang maparilaksana wyadin sane mangakusara wenang kapidanda sekadi pararem.
- (2) Ring Karang Suci minakadinne Pura – pura , tan pisan dados merem makemit awor wong lanang mwang pawestri sane sampun mayusa 13 warsa ngunggahang, Sang sane mamurung wenang kapidanda manut sekadi pararem.

Pawos 38

- (1) Mangde Pasukertan tata agamane prasidha lajer tur kaweruhan warga Desa Adate indik Tatwa- tatwa Agama sayan maweweh , patut kawentenang pamuspan – pamuspan sinareng satunggil Purnama, Tilem magenah ring Pura Desa wyadin Pura Dalem kawewehin antuk Dharma Wecana wyadin Upanisadha.
- (2) Odalan Saraswati patut kalaksanin olih warga Desane sami sinarengan magenah ring Pura Desa , kawewehin antuk Dharma Wecana utawi Upanisadha miwah wawaca –wawaca Kidung lan Kakawin.

Pawos 39

- (1) Ritakala wenten Upacara – upacara sane mabuat ring silih tunggil pura Tri Kahyangan minakadinia patoyan, pelisan :
 - i. Tan wenang kawentenan tontonan- tontonan, hiburan – hiburan miwah keramaian tiyosan ring sewowongkon Desa Adat Mengwitani, sajawaning wali –wali. Sang mamurug, kapidanda sekadi pararem.
 - ii. Para pemangku Pepeletan mangda sami rawuh nangkil pacang nyada pakaryan Mangku Kahyangan Tiga , saking ngawit ngantos puput, tur pacang kahaturang sangu manut kahanan lan kasidhan duk punika.
- (2) Panyade pelaksanaan Upacara ring Tri Kahyangan Desa lan rikalaning Pelisan salami tigang wengi ngalantur, kalaksanayang malarapan pagiliran saking sowang –sowang tempekan awengi – wengi , saking ngawit ngantos puput, utamane olih Taruna – tarunine,



kasarengin santi – santi kekidung mwah kekawinnyane, Papendetan mwah sakalwirnia, indik dedudonan tedun ngayah kapidabdabang ring perarem.

Pawos 40

Tan wenang nagingin pinget-pinget wyadin adan pawongan, sekehe miwah sane lian – lianan ring palinggih, ring wewangunan, pratima miwah sakalwirnia druwen Desa Adat , malarapan antuk aturan , dana punia miwah sakalwirnia. Sang sane tan tinut, aturan wyadin danapuniania patut katulak waliang.

Pawos 41

- (1) Ngadegang Pamangku patut nganutin dadudonan kadi ring sor : mawit saking pratisantanan Mangku , malarapan saking nunas pawus Widhi wyadin Nyanjan , sangkaning sasudian I Krama Desa Adat wyadin I Krama Pura.
- (2) Sane tan dados kaadegan mangku lwire : wong peceng, sengkok, perot, congeh, poleng, wyadin belang, keneng, kepek, kipa, bancih, sakit ila, wyadin manular, buduh, ayan – ayanan, pecak ngambil baluan wyadin sapihan kaanggen rabi.
- (3) Upakara Pawintenan wyadin padiksaan Pamangku Kahyangan Tiga miwah Prajuru Desa Adat , patut magenah ring Pura manut amongania dadudonnia sowang sowang, tur prabiyannia kategen olih I Krama Desa Adat sami.

Pawos 42

- (1) Indik Piodalan ring Kahyangan Tiga Desa Adat Mengwitani lan upacara Pelisan ring Desa Adat Mengwitani kesanggra olih Krama Desa Adat Mengwitani , inggiang pelaksanannyane antuk nyanggra kapidabdabang ring Perarem Desa Adat Mengwitani.
- (2) Satunggil ngayah makarya adat ring dije ja, minakadinia ring pura –pura , patut mapangangge adat sane manut.

Pawos 43

- (1) Kalaning pacang muspa ring Pura –pura, patut mapangangge Adat sepatutne manut Desa kala patra duk puniki , saha makta sapirantining muspa, tur patut satinut ring paridabdab prajuru, para Pamangku miwah sane ngawiwenang ring pura sewosan.
- (2) Sekancan aturan wyadin panawuran sane kaleleb, patut kasadok ring prajuru Desa Adat, mangda inilikita sapatute.
- (3) Satunggil maturan ring pura –pura Tri Kahyangan, sasarin canange sanistania mapangarga 2 keteng jinah bolong utawi manut pidabdab Pararem Desa Adat.



-
- (4) Upacara Upadrawa, sumpah, cor, dewa saksi miwah sakalwirnia, sane melarapan saking wicara wyadin iyeg , yaning pacang kalaksanayang ring Pura , patut kalaksanayang ring Pura Puseh.

Pawos 44

- (1) Swadharman Parekan Desa : Nyade Kelian Desa Adat ngelaksanayang Upacara- upacara ring Kahyangan Tiga, saking ngawit ngantos puput.
- (2) Paolih – olihan Parekan Desa : Luput papeson kalaning patoyan ring Kahyangan Tiga, tur polih pica amatra satunggil pelisan merupa busana poleng, manut kahanan miwah kasidan Desa Adate duk punika.
- (3) Tiyosan ring Parekan, tan wenang ngangge busana poleng sane mamada ring busana Parekan utawi Kelian Desa Adat.

Palet 2 Indik Resi Yadnya

Pawos 45

- (1) Silih sinunggil pacang mapudgala, madwijati wyadi mabresih, sajawaning nunas panugrahan ring sang ngawiwenang upaminyane Parisadha Hindu Dharma, Kantor Departemen Agama Hindu sane lian – lianan, patut taler pinih riyin masadok ring Kelian Desa Adat.
- (2) Kelian Desa Adat patut sareng marityaksa tur nyaksinin pamargin Upacara Mapudgala, Madwijati wyadin mabresih sane kalaksanayang olih silih sinunggil warga Desa Adat Mengwitani.

Pawos 46

Sinalih tunggil sane pacang mewinten ngamargiang penyontengan, dalang makamiwah sane lian-lianan sane wenten rentetnyane ring laksanaan yadnya, taler patut masadok ring Kelian Desa Adat miwah Kelian Adat Banjar.

Palet 3 Indik Pitra Yadnya

Pawos 47

Satunggil wenten Krama Desa sane lampus wyadin lina :

- (1) Sang sane nruweyang wyadin sane ngakusara sane lampus punika patut :
1. Masadok tur nunasang ring Kelian Desa Adat malarapan Sedan Setra indik padewasan pakutangan miwah sane lian – lianan , majalaran antuk canang tubungan atanding masari 11 keteng jinah bolong utawi sesari manut Perarem.



2. Yaning sane lina puniki anak alit sane dereng kepus pungsed, dados pendem pramangkin tan sandang tunasang dewasa, sakewanten wenang mepajati ring Pura Mrajapati tur mesadok ring dane Sedan Setra.

- (2) Sedan Setra patut ngamedalang padewasan ring sang sane nunasang.
- (3) Sang sane mamurug, wenang kapidanda pedewasaan ring sang sane nunasang.

Pawos 48

- (1) Pawilangan dinane sane tan dados margining makutang , inggih punika mendem wyadin nunjel sawa : Rikala Pasah, Kala Gotongan , Semut Sadulur, Purnama, Tilem, Buda Keliwon, Saniscara Keliwon, Soma Umanis Watugunung, Anggara Pahing Watugunung, Patoyan Ring Tri Kahyangan , Was nganten, Penyajan Galungan, miwah Pekarsan sang ngawiwenang. Sang sane mamurug wenang kapidanda sekadi pararem.
- (2) Asing asing krama sane pacang ngeker padewasan wenang nunas pedewasan ngeker ke Sulinggih utawi Pandita, riantukan Desa Adat tan wenang ngemedalang Ngeker Dewasa, tur sang sane ngeker punika wenang mesadok Sedan Setra inucap.
- (3) Sane kebawos Ngeker padewasan Pekutangan yaning pacang Ngaben Sawa Sedana tur meupakara sukla Utama utawi manut tetimbangan Prajuru mwang Sedan Setra.
- (4) Sang ngeker Dewasa tan wenang keni kesandung olih sang makutang.
- (5) Yaning wenten anak padem unukuran ring sang sane ngeker dewasa, tur pemargin pakutangania pacang ngarikuhin pamargin sang ngeker dewasa, sang sane padem unukuran puniki patut ngalah, tur satinut ring tetimbangan Prajuru mwang Sedan Setra.
- (6) Indik bebratan Setra tan wenang Nginapan Bambang utawi pemuhunan, patut ngaryanin bambang utawi pemuhunan ring rahina pengutangan inucap. Yanning wenten memurug wenang kapidanda manut pidadab ring Pararem.

Pawos 49

- (1) Tata cara Pakutangan manut sekadi ring sor :
 - 1. Tan wenang makirim : Inggih punika ngajang sawa sale genti pacang kakutang ring setrene asiki , ring rahinane asiki.
 - 2. Tan wenang Ngutang Tiga : Inggih punika ring rahinane asiki ngutang sawa tigang diri, ring setrene asiki, lintangan ring tigang diri dados. Indik dedudonan Ngutang tiga puniki kepidadabang ring Perarem.



3. Tan wenang Ngalangkar Watang : Inggih punika ngimpasin umah sane madaging watang kalaning mamargi ngutang sawa ke Setrane, sajawaning indik sawane ring umah punika sampun masobaya pacang masekeh utawi ngeker dewasa.
4. Tan wenang Pakutangan Tan Nganutin Padewasa : Inggih punika makutang sakuni – kuni dinane.

(2) **PAKELING :**

1. Makasami Tata Cara Pekutangane sane patut, dados kapurung, yening kahanan jagate kanjekan , mayudha, gerubug, huru – hara miwah kawicaksanan sang ngawiwenang.
2. Yaning wenten nyejer Arca lingga ring sejeroning Kahyangan Tiga Desa Adat Mengwitani sedan setra tan wenang ngemedalang Padewasan Pekutangan selamin nyejer Arca lingga punika.

Pawos 50

- (1) Sawa wong sakit ila, mati salah pati , mati ngulah pati, mati urat pati ,wenang kaupakara sekadi ngupakara sawa anak biasa.
- (2) Pakeling : Wong sakit ila , sekantune ipun urip , patut matambe ring genah sepatut ipun.

Pawos 51

- (1) Yaning mendem sawa, ring gagumuknyane patut dagingin pinget antuk paras wyadin sane lianan, madaging tanggal pananemania. Sane samurug, wenang kapidanda sekadi pararem.
- (2) Papendaman sawa sane dereng matuwuh 1.260 dina wyadin telung warse tan wenang katepogin wyadin gagah. Sang sane mamurung wenang kapidanda manut pidabdab pararem.

Pawos 52

- (1) Yaning wenten sawan anak liyanan ring Warga Desa Adat Mengwitani pacang kapendem ring silih tunggil Setrane ring Desa Adat Mengwitani , dados, sakewanten mangda janten pastika parindikan ipune, lwire : asal – usul ipune manut surat – surat keterangan resmi, sulur – sulurnyane wenten ring Desa Adat Mengwitani, parindikan geringnia , pariindikan pademnyane miwah sane lian – liannan. Tur dane sang sane ngakusara wyadin nyerenggarain sawa punika patut satinut ring tata cara pakutangan wyadin dresta Krama Desa Adat Mengwitani sane meagama Hindu sekadi pararem.
- (2) Yaning wenten sawa ring wawidangan Desa Adat Mengwitani sane ten wenten ngakusara wyadin sawa punika tan kaelingan, pinih riin patut sadokang dumun ring sang angawarat. Risampun patut tanem, patut I Krama Desa Adat sane nanem sawa punika majalaran Krama Banjar sane ngawidangin genah sawa punika, maruntutan Upakara secaraning Hindu sesidhan – sidhan taler manut ring perarem Desa Adat.



-
- (3) Yaning wenten sawan anak beling, rarene ring weteng patut medalang dumun, raris pawargi pangutangania dados sekadi biasa.
 - (4) Ring wewidangan Desa Adat Mengwitani tan dados nanem sawa tiyosan ring setrane sane sampun wenten . Sang mamurug , wenang kapidanda marupa : ngagah tetaneman sawa punika, Ngupakara Desa sepatute, saha denda agengnyane manut pidabdab pararem Desa Adat.

Pawos 53

- (1) I Krama Banjar wyadin I Krama Desa Adat wenang dabdab wyadin ngupapira Setra amongania sowang- sowang , mangda prasida paridabdab Setrane punika becik.
- (2) Krama utawi Warga Desa Adat Mengwitani tan wenang kepatutan ngaryaning Kuburan Permanen (sane malakar antuk paras , beton miwah sane lian – lianan), Yaning Mamurug wenang kapidanda manut pararem , tur kuburan inucap kebugar olih pengempon Setra inucap, sejabaning kuburan sane sampun wenten kesinengguh monomen tur sampun pastika polih pamikukuh saking sang awerat Panegara Republik Indonesia melarapan antuk surat- surat sejangkepnyane kesinengguh dane Pahlawan Nasional.

Pawos 54

- (1) Pakutang malarapan antuk makingsan , inggih punika makutang sakuni – kuni dinane tanpa upakara, tan dados.

Pawos 55

- (1) Pamargine ngutang sawa ke setrane patut ngamarginin margine sane ketah wantah patut marginin, yadiastun ring margine. Sang mawurug, wenang kapidanda sekadi perarem.
- (2) Yaning wenten anak padem ring genah sane tan perah, upaminyane ring sawah , ring pangkunge miwah sane lian – lianan, kalaning makta sawannyane budal, patut ngamarginin marga sane kapituduh olih Kelian Desa Adat tur risampune puput, margine punika patut kaupakara sapatute olih sang madruwe sawane.

Pawos 56

- (1) Sapa sira ugi pacang ngaben, patut masadok ring Prajuru Banjar mwan Prajuru Desa Adat
- (2) Indik pikoli wyadin pangingune ring I Krama Banjar saking sang ngaben , kaanutang ring agung alit pangabenane punika manut pararem sowang –sowang Banjar Adat.
- (3) Yaning wenten anak ngaben ngalanus, tan wenang kasandungan.



Pawos 57

(1) PAKELING :

Iki daging ucaping YAMA PURANA TATWA sane patut kalaksanayang olih I Warga Desa Adat Mengwitani kalaning ngupakara sawa, lwirnia kadi ring sor puniki :

Manut ucaping Yama Purana Tatwa, tingkah angupakara sawa, agung, alit, madya, utama, sang meagama Hindu ring Bali Rajya, satunggil padem tan wenang pendem, mangda mageseng ugi , asapunika patut ipun, mangda prasidha sang Atma mantuk ring Ida Bhatara Brahma kapilih rahajeng Sanghyang Atma. Upakara ngeseng :

Daksina asiki , canang pitung tanding, jinah bolong satak salawe keteng, beras catur Warna mewadah temekur. Bebanten sami puniki megenah ring dadaning sawa sane mageseng. Risampun dados awu, arengnia supit cara pinipis ring watu wyadin sasenden pada wenang , raris wadahin kalungah kelapa gading sane sampun hinasturi, pirate, katipat pasom, saji punjungan putih kuning, mwanng dyus kamaligi. Sampun puput mayaban , raris anyut Puspa asti punika. Pungkuran dados sakama –kama amretaka sapakrianing sang atma wedana : **Mamukur wyadin Nyekah.**

Sapunika parindikania manut kecaping YAMA PURANA TATWA, sidha amangguh rahajeng sang Pitara. Makasami Upacara puniki wenang kapuput olih sang Brahmana welaka wyadin mangku Mrajapati / Dalem.

- (2) Mangdaning jagat Desa Adat Mengwitani sayan – sayan ngemecikan wenang Desa Adat ngewentenan Pengabenan lan Memukur Massal selamin- laminnyane limang warsa apisan utawi sealit – alitnyane wenten nyarengan ngaben tigang dasa sekah.
- (3) Mandaning paiketan krama lan warga Desa Adat Mengwitani sayan –sayan raket , ritatkala Desa Adat ngewentenan Pengabenan lan Memukur Massal wenang patut sewilangan krama ngewantu parikrama inucap antuk punia kapidadab ring Perarem.
- (4) Ritatkala Yadnya Pengabenan puniki kewentenan Prajuru Desa Adat Mengwitani wenang ngadegan Prawetaka Karya inucap tur sekancan Prebiya punika keutsahayang olih Desa Adat Mengwitani.

Pawos 58

(1) Cuntaka martos leteh, sebel wyadin samben.

(2) Bacaan miwah laminnyane cuntaka :

1. Cuntaka sangkaning sebel ring raga, laminia ngawit sebel kumantos masucian wyadin mambuh.
2. Cuntaka sangkaning ngalekadang anak alit , laminia sanistania 42 dina ngawit saking ngalekadang mapamuput antuk toya pebersihan . Sane lanang, sanistania rawuh ring kepusan pungsed.
3. Cuntaka sangkaning karuron, laminia sanistania 42 dina ngawit saking karuron mapamuput antuk upakara pabersihan.
4. Cuntaka sangkaning ngarorod, laminia ngawit ngarorod kumantos matirta pabyakawonan.
5. Cuntaka sangkaning gamia gamana, laminia ngawit saking pangrorodan kumantos kapalasang tur maupakara mrayascita raga mwanng Desa Adat.



6. Cuntaka sangkaning salah timpal, laminia ngawit ngarorod kumantos kaupakara sapatute manut Adat Agama Hindu.
 7. Cuntaka sangkaning beling tan wenten ngangkenin, laminia ngawit saking katangehan kumantos kaupakara sapatute manut Agama Hindu.
 8. Cuntaka sangkaning ngalekadang rare babinjat, laminia kumantos upakara pamerasan ring anake alit, tur sanistania 42 dina saking anake alit embas kumantos mapamuput antuk upakara parayascitan.
 9. Cuntaka saking mitra ngalang, laminia ngawit katangehan, kumantos maupakara pawiwahan sapatute manut Agama Hindu.
 10. Cuntaka sangkaning kematian :
 - i. Kaluarga ngarep : Laminia ngawit padem maweweh **wusan ngororasang** saking pakutangan.
 - ii. Kaluarga tan ngarep : Laminia ngawit rauh ke genah sang kelayu sekar inucap maweweh wusan risampune katur Bayukawonan lan Prayascita utawi selamin-laminnyane 3 rahina saking pakutangan.
 - iii. Warga Banjar Adat : Laminia ngawit swaran kul-kul kamatian kumantos maweweh wusan risampune katur Bayukawonan lan Prayascita utawi selamin-laminnyane 3 dina saking pakutangan , taler kapidabdabang ring perarem.
 - iv. Pajenuk sane boya ja warga banjar wyadin keluarga sang lampus, laminia ngawit saking ngaranjing kaumah sang lampus, kumantos matirta pebresihan utawi malukat antuk toyan cacapan paon.
- (3) Wong kacuntakan tan wenang ngaranjing ke Karang Suci, utawi ngalaksanayang karya sane keanggep suci.
- (4) Sane tan kawenangan kacuntakan sangkaning kamatian keluarga tan ngarep (Purusa, Natah siki, pewaregan siki) :
1. Sang Sulinggih
 2. Sang angawa rat, minakadinia Kelian Desa Adat.
 3. Pamangku Kahyangan Jagat, Kahyangan Desa miwah Pemangku Kahyangan Tiga.
 4. Sang Tri manggalaning yadnya, inggih punika :
 - Ha. Sang madruwe Karya Yadnya.
 - Na. Sang ngetangang Upakara minakadinia Tukang banten, sang sane mapitulung Sangkaning kesungkeman Paruman Banjar Adat.
 - Ca. Sang muput Karya.

Pawos 59

- (1) Kelian Desa Adat miwah Mangku Tri Kahyangan Desa lan Mangku Kahyangan Desa yaning kamatian keluarga ngarep minakadinia Bapa, Meme, Somah muah pianak, mantu, cucu dados ngambil cuntaka ngawit saking kepademan maweweh wusan ngororasan utawi selamin – laminnyane 12 dina saking pakutangan.



-
- (2) Kelian Desa Adat miwah Mangku Tri Kahyangan yaning mapisalah indik kecuntakane mawastu ragane samben , wenang kaparisuda antuk Upakara Panyepuhan wyadin Prayascita saha mahening – hening.
 - (3) Yaning nujuang wenten Karya Ayu Desa, I Kelian Desa kacuntakan pakaryania wenang kasaladiyan oleh petajuhnyane utawi wakilnyane wyadin parekan Pura, utawi Pangawantunia sewosan.
 - (4) Yaning Mangku Tri Kahyangan kacuntakan, kalaning wenten Upakara sane sandang laksanin ipun, pakaryania wenang kasaladiyinin olih Mangku siwosan sane kajudi olih Kelian Desa Adat.

Palet 4

Indik Manusia Yadnya

Pawos 60

- (1) Manusa Yadnya inggih punika Upakara- Upakara dharmaning manusa , ngawit saking panemoning kama petak kalawan kama bang sejeroning gargha I biyang ngantos lampus riwekasan.
- (2) Upacara ring ajeng madudonan kadi ring sor :
 1. Magedong- gedongan, duk pangarampinian I biyang (yusa bobote 3- 4 sasih).
 2. Duk rarene wawu medal.
 3. Kepus pungsed.
 4. Ngalepas aon, sasampun rarene mayusa 12 dina.
 5. Akambuhan, rarene mayusa 42 dina.
 6. Tigang sasih wyadin nyambutin.
 7. Aweton, risampune rarene mayusa 6 sasih.
 8. Ngempugin riwawu tumbuh untu.
 9. Makupak utawi maketus.
 10. Munggah Deha Taruna.
 11. Mapandes wyadin matatah.
 12. Mawiwaha utawi madengan-dengan
 13. Mawinten.
- (3) Upakara – Upakara sowang- sowang ring ajeng, nista, madya mwang utama, nganutin sastra Agama miwah catur dresta , makabuatan Desa drestane ngawiwenang sima cara Banjar ring Desa Adat Mengwitani.



Palet 5

Indik Bhuta Yadnya

Pawos 61

Sakalwiring Bhuta Yadnya, inggih punika Upacara muwang Upakara Pabhyakalan wyadin Pacaruan ring Pratiwi, Kahyangan, sarwa prani, Babhutan, miwah sane lian –lianan patut kalaksanin sabecik- beciknyane manut patajuh sang ngawiwenang minakadinia Parisada Hindu Dharma miwah Prajuru- prajuru sawosan. Sang sane mamurung, wenang kepidanda manut Pararem.

Pawos 62

- (1) Ri kala Nyepi, lamin ipun 24 jam, tan wenang mamurung babaratan panyepian minakadinia : maapi- api, malalungan, maliang – liangan sane kalintang , makarya, matatepakan, miwah maramame –rame sewosan, sajawaning sang polih pakaryan ngemit kasutrapting Desa, bhayantaka, ngurusang sakit, ngelah rare alit, ngabag watang, miwah pakewuh- pakewuh sewosan.
- (2) Sane mawurung, wenang kapidanda manut pararem.

SARGA V

SUKERTA TATA PAWONGAN

Palet 1

Indik Pawiwahan

Pawos 63

Pamargi Pawiwahane sane patut, manut dudonania, kadi ring sor puniki :

- (1) Yaning pangerorodane madasar antuk tresna – kapitresnain, patut ngalaksanayang pamargine sane tatiga, inggih punika :
 1. Ngelaku, inggih punika sagelise ngaku nyuwang ring sang madruwe luhe.
 2. Malaku, artin ipun rawose ngidih malarapan antuk makruna. Saking sang lanang masuaka ring sang madruwe luhe, tur ngawentenang pasobhaya dewasa pacang muputang sapuluh – palih Pawiwahane, sekala –niskala.
 3. Ngeluku, inggih punika ngukuhang, daging ipun mitegasang pamupute ring sekala mwang niskala, asapunika taler indik pasobhaya pawarangane.
- (2) Ring asapunapine, pamargine sane tatiga puniki dados taler cutatang, manut rikuh antar pamargine, pasobhayane miwah sane lian – lianan.



-
- (3) Yan rumasa samben sang madruwe luhe, risampune saking sang lanang ngawentenang pangelakuan , dane wenang ngawentenang pamitetes, inggih punika maritatasang indik pamargin okan danene ring genah pangerorodane.
 - (4) Sakewanten makasami pamargi pangerorodane puniki patut kasaksinin olih Prajuru Banjar miwah Prajuru Desa Adat.

Pawos 64

Tan wenang ngambil rabi , anak kantung makurenan, yan punika kapurug. Wenang kapidanda marupa : Upacara pawiwahan tan pacang kasaksinin olih Prajuru Banjar mwanng Prajuru Desa Adat, tur yaning pariindikane puniki ngawetuang wicara, wicara puniki pacang kaibahang ring sang ngawiwenang.

Pawos 65

- (1) Yaning wenten I Krama Desa Adat kaicalang pianak Luh, sejeroning tigang rahina ipun patut ngarepot ring Prajuru Banjar.
- (2) Yaning janten I pianak luh punika nganten , kul-kul Banjar patut kaswarayang ping tiga.
- (3) Yaning sajeroning tigang rahina icalnyane tanpa samodhana, I Krama Banjar patut ngawantu nyarengin san kecalan puniki masaserep, majalaran swaran kulkule bulus sapatute, tur masadok ring sang ngawiwenang.

Pawos 66

Sakalwiring Pangerorodan sane magenah ring silih tunggil Banjar ring Desa Adat Mengwitani, pamargine patut madudon kadi ring sor :

- (1) Sang sane kegenahin parorodan punika patut digelis masadok ring prajuru Banjar.
- (2) I Prajuru Banjar patut ngarawuhin tur maritatasang pariindikan sang ngarorod sareng kalih :
 1. Yaning janten pamargin pangerorodane madasr antuk papaksan wyadin kahanan sang ngarorod tan manut indik minakadinne kantung kaliwat alit, I Prajuru Banjar wenang mintet dumun pangerorodane puniki, tur segelise masadok ring Prajuru Banjar wyadin Prajuru Desa Adat sang ngarorod punika, mangda Prajuru –Prajuru puniki gelis rawuh muputang wirannyane, Prajuru – prajuru puniki gelis rawuh muputang wicaranyane.
 2. Yaning janten parorodane puniki madasar, puniki pacang matilar saking genahnyane ngarorod puniki, patut taler ngawentenang yuran sepatute.
- (3) Rikalaning pangarorodane puniki pacang matilar saking genahnyane ngarorod puniki, taler ngawentenang pasadok ring Prajuru Banjar.



Pawos 67

- (1) Indik Pangerorodan, sadurunge kulkul Banjar sang keicalang maswara nyihnyang munggwing okannyane luh ical sangkaning ngarorod, tan wenang pakadangan sang lanang rawuh kaumah san luh pacang malaku wyadin makruna.
- (2) Yaning ngantos tigang rahinane kulkule dereng maswara, rowang sang lanang dados ngaluku rawuh ring Prajuru Adat mwang Prajuru Dinas Banjar Sang Luh, yaning kapurug olih sang lanang , sang adruwe luhe ta wenang nampi pakrunan sang lanang , sedereng sang lanang rawuh, nyawaka sinampura indik kapramadan ipun. Yaning sang luhe nampi, ipun wenang kapidana marupa : Upacara pawiwahan pianak ipune salanturnyane tan pacang kaakusara olih Prajuru Banjare mwang Prajuru Desa Adat.
- (3) Tiosan ring upakara miwah ring upacara mangda mamargi sapatute, taler patut nunas surat keterangan ring Kelian Desa Adat, maka cihna munggwing parabiannyane punika sampun patut manut Adat.
- (4) Pinunase puniki melarapan antuk jinah batu –batu akahnyane sekadi pararem.

Pawos 68

- (1) Yaning sentana luh angamet laki angge ipun kurenan tur kaajak ring umah sang luh punika parungguan sang laki sane nyeburin punika tan wenten sewos wantah pawakan luh, boyaje nyentane. Taler sapuluh- palih Upacara Pawiwahan tan wenten wicaranya, sajawaning wenten samaya sawosan.
- (2) Santana luh kalaning maparabian , yadiastun ipun maparungguan lanang , tan wenang ngemaduang anak lanang, yaiastun katerima olih kurenan ipune.
- (3) Ipun wenang maparabian malih yaning sampun mabukti pisan kurenan ipun punika gering sane dahat mabuat wyadin tan nyidhayang ngalaksanayang pasanggaman, manut keterangan dokter , sakewanten kurenan ipun kapratama patut palasang , wireh anak luh tan wenang ngamaduang anak muani, tur sane kapalasang puniki patut kaicen pasangon sapatutnyane.
- (4) Makasami parindikane puniki patut kasaksi olih Prajuru Banjar miwah Prajuru Desa Adat madasar antuk Surat Piteket. Sang sane mamurug wenang kapidanda manut pararem.

Pawos 69

- (1) Sang lanang sane nganten nyeburin sentana luh, tan wenang ngemaduang, sejawaning sampun katampi olih kurenan ipune sane sampun mayuse limolas warsa ngunggahang.
- (2) Parungguan madun Santana luh puniki patut kadabdab sapatutnyane indik swadharma lan wiwenang miwah pianak dane salanturnyane ring paumahan punika, kaunggahang ring surat piteket sane kesaksi olih pakadangan sentana luh puniki, Prajuru Banjar muang Prajuru Desa Adat.



Pawos 70

- (1) Wong lanang sane kaamet rabi ring Santana luh, sederengnyane madruwe pianak. Sentana luh punika raris lampus :
1. Wenang mangolah sapadruwen wyadin panguan kayanyane sareng kalih pacak, sawawaning marupa warisan- warisan leluhur , kaanggen ngupapira kahuripannyane selanturnyane.
 2. Dane wenang magenah ring umah sentana luhe punika salamin- laminnyane.
 3. Yaning dane padem, sawanyane patut kaupakara sapatute olih pakadangan sentana luhe punika. Yaning wenten padrweannyane punika tatinggalan, wenang dados padruwean umah punika sareng sami.
 4. Tan wenang nganten malih sajeroning umahe punika, sawawaning kabebasan olih pakadangan sentana luhe inucap.
- (2) Wong lanang sane kaamet rabi ring Santana luh, sasampune dane madruwe pianak , raris katinggal padem olih sentana luh punika :
1. Dane wenang ngolah sapadruwen wyadin sapagunakayan ipun sareng kalih pecak, saha warisan leluhur sane sampun pasti dados bagian sentana luh punika, kaanggen ngupakara sawa sentana luh punika sapatute, tur ngupapira kahuripannyane sareng pianaknyane salanturnyane, tur dane wenang polih tetagonan sapatute.
 2. Dane wenang kantong magenah ring umahe punika sasuwen- suwenia. Yaning ipun mamamah pacang nganten malih tur mangda kantong dados magenah ring umahe punika, dane patut polih lugraha saking pakadangan sentana luh inucap miwah pianaknyane, kasaksinin olih Prajuru Banjar mwang Prajuru Desa Adat majalaran antuk surat piteket.
- (3) Asapunika pisan kadi ring ajeng taler paridikan pangantenane biasa, inggih punika sang lanang mawak lanang, sang istri mawak istri.

Pawos 71

- (1) Balu pawakan luh, wenang maparabian malih tan pasantulan, sakewanten dane patut matilar saking umah kurenannyane. Pecak saha matalang, sawawaning wenten paweweh saking pakadangan pecak kurenannyane. Dados taler dane budal bajang kaumah asalnyane, artinia wenang kaamet rabi olih wong lian, tan wenang santulin.
- (2) Balu pawakan luh, wenang kawaliang sangkaning becik –becik kaumah asal dane, yaning sampun mabukti dane mabikas kawon, minakadinne, mamotoh, mamunyah, demen mamitra, boros meadep-adepan tanpe unduk, tan rungu ring paumahan mwang pakadangan, miwah duskertane sewosan, tur tan satinut ring pangelemek wong katah , minakadine Prajuru.
- (3) Maka sami parindikan- parindikan ring ajeng patut kasaksinin olih Prajuru Banjar mwang Prajuru Desa Adat.



Pawos 72

Yaning wenten katanggehan wong masanggama ngajak anak sane boya ja kurenan ipun, wenang Kapidandakadi ring sor puniki :

- (1) Yaning dereng beling, wenang sareng kalih kapidanda sekadi pararem.
- (2) Yaning katanggehan risampune beling, sakewanten belingnyane wenten sane ngangken, sang kalih wenang kapidanda sekadi pararem.
- (3) Yaning sane mamitra puniki sami – sami kantun ngelah kurenan, patut kapidanda sekadi pararem.
- (4) Yaning katanggehan risampune beling tur belingnyane tan wenten sane ngangkenin, wenang kapidanda sekadi pararem.

Palet 2

Indik Sapihan

Pawos 73

Sang maparabian palas makurenan :

- (1) Yaning silih tunggil tan marem mamunyah, mamitra, mamotoh, boros, maadep- adepan tanpa unduk, tan sida ngawetuang sentana, mati samara, tan lingu rugi paumahan, muang pakandangan miwah prahyangan, tan lingu ring tategenan- tategenan sewosan , tan satinut ring pengelemek wong katah minakadinia Prajuru.
- (2) Yaning kurenan luh sane wantah mapedewekan luh sane melaksana wyadin makahanan sekadi ring ajeng , wenang kawaliang sangkaning becik – becik kaumah danene pecak, inggih punika kapalasang malih bajang.
- (3) Yan sane muani padewekan luh sane melaksana wyadin makahanan sekadi ring ajeng, taler wenang kawaliang sangkaning becik – becik kaumah danene pecak, inggih punika kapalasang malih taruna.
- (4) Tiyosan ring dasar – dasare kadi ring ajeng, tan pisan dados ngamaduang wyadin malasan kurenan, sajawaning sampun polih lugraha saking kurenan ipun wyadin pianak ipune.
- (5) Sang sane mamurung, wenang kapidanda sekadi pararem.
- (6) Makasami paridikane puniki patut kalaksanain olih Prajuru Banjar mwanng Prajuru Desa Adat malarapan antuk surat – surat piteket sepatutnyane pinaka pekukuh perjanjian – perjanjian wicara puniki.

Pawos 74

Anak sane sampun pecak palas makurenan, prada atep malih, sakewanten patut parisadu ring prajuru Desa Adat , tur kapidanda sekadi pararem.



Palet 3

Indik Sentana

Pawos 75

- (1) Sane kaanggehang sentana inggih punika pianak ngawaris, inggihan lanang, inggihan wadon.
- (2) Kewentenan sentana punika wenten kalih soroh, inggih punika : sentana rinupaka wyadin pianak buah basang , miwah sentana paperasan.

Pawos 76

Sane patut keanggehan sentana wyadin pianak ngawaris manut dudonannyane kadi ring sor :

- (1) Pinih ajeng sentana buah basang , inggih punika preti sentana wyadin pianak cucu utawi katurunannyane sane kantun ajake jumah , yadiastun lanang inggihan wadon.
- (2) Yaning dane tan madruwe pianak buah basang , dane wenang ngangkat sentana madasar antuk paperasan manut dudonan kadi ring sor : Kapratama, pianak nyama tugelannyane sane kantun ajake jumah , yan tan wenten , dados pianak misannyane saking purusa, yan tan wenten, dados pianak mindonnyane saking purusa, asapunika salanturnyane kumantos rawuh ring sapakadangnyaane tunggal sumbah.
- (3) Sakewenten makasami pengangkatan sentana puniki mangda majalaran antuk : Upacara Pamrasan sepatutnyane pinaka cihna sang kapras wyadin kaangkat sentana puniki, parungguannyane pateh pisan sekadi ring parungguan sentana buah basang . Tur makasami pariindikane puniki miwah sapakadangan sang kaangkat, Prajuru Banjar mwang Prajuru Desa Adat , kapikukuh antuk surat – surat piteket sepatute.

Pawos 77

- (1) Ngangkat sentana dados lintangan ring adiri, yaning :
 1. Sentana kapretama padem wyadin sering sane dahat mabuat manut keterangan dokter, sedereng dane maparabian.
 2. Ngantos mayusa tigang dasa warsa tan kayun angamet rabi, sajawaning ipun kantun masekolah.
 3. Tan sida ngawetuang sentana wyadin katurunan, manut kadi katerangan dokter.
 4. Maparilaksana dahat kawon, upami : magagadean wyadin maadep- adepan tan manut krama, mamotoh, mamunyah, mamitra, tan lingu ring paumahan, tan lingu ring pakadangan, tan lingu ring tategenan, tan ngidepang pangelemek wong katah miwah bikasne sane dahat kawon sewosan.



-
-
- (2) Makasami parindikan puniki kasaksinin olih prajuru Banjar mwanng Prajuru Desa Adat, kapikukuh antuk surat piteket.
 - (3) Sang mapurung parindikane ring ajeng, wenang kapidanda manut pararem.

Pawos 78

- (1) Tan wenang ngangkat sentana kalih diri raris keantenang, riantukan ngelaksanin gamia gamana, inggih punika sumasat ngantenang anak manyame tugelan.
- (2) Sang murung, wenang kapidanda marupa :
 1. Ngupakara marisuda jagat, saha kapidanda sekadi pidabdab pararem.
 2. Sang nganten puniki kapalasang.

Palet 4

Indik Warisan

Pawos 79

Sane kaanggehan warisan inggih punika sakalwiring padruwen tatinggalan sane sampun padem. Warisan punika wenten marupa artha brana wyadin barang –barang, tetegenan, hutang piutang, parindikan wyadin wicara miwah sane lian – lianan.

SARGA VI WICARA LAN PAMIDANDA

Palet 1

Indik Wicara

Pawos 80

- (1) Ring asapunapine ring wicarane asiki wenang katiwakin pidanda lintang ring asiki, dados sapisanan, dados taler maturutan manut kahanan wicarane.
 1. Nora, inggih punika danda marupa kapuwikin wyadin kahuwusang makrama adat suka duka.
 2. Panundungan, inggih punika pamidanda marupa kagediang saking Desa Adat Mengwitani, utamane ring wicara warga Desa sane mawit saking dura Desa.
- (2) Indik pamidanda nora miwah Panundungan puniki sadereng katibang patut katimangin dumun sebecik- beciknyane antuk parum Prajuru Desa Adat Mengwitani, tur taler nunas timbangan ring Prebekel miwah Camat, yadiastun wicara puniki wenten ring Banjar.
- (3) Mangda paniwakan –paniwakan Pamidanane prasida mamargi patut tur Wicaksana, patut ketiwakin ring paruman KERTA DESA ADAT mungging karyania, nimbang wicara – wicara sane dahat mabuat, inggihan wicara ring Banjar, wicara ring Desa Adat, miwah wicara- wicara Adat sewosan, sane rumasa tan sida kapuputang olih Prajuru serahina



kewanten. **Tetimbangan Kertha Desa inucap keputus olih Prajuru Jangkep Desa Adat Mengwitani.**

- (4) Yaning KERTHA DESA ADAT puniki tan sidha karya, wenang Prajuru Jangkep sami pawum, pacang niwakang pamutus wicarane.

Palet 2
Indik Pamidanda
Pawos 81

RUPAN – RUPAN PAMIDANDA LUWIRE :

1. PANGLEMEK : Utamane ring wicara pakurenan wyadin pasemetonan.
2. PATINGET : Utamane ring wicara pamurungan dangan.
3. PANGAWALIAN : Utamane ring wicara pangrusakan.
4. PATIKELAN : Utamane ring wicara babayahan , papeson , miwah sane lian lianan.
5. DANDA : Marupe jinah, ring wicara pamurugan sane mabuat.
6. KASEPEKANG : Kapuwikin, kumantos bikasnyane masalin becik.
7. NORA : Kahuwusang, utamania ring wicara pamangkangan.
8. PANGIBAHAN : Inggih punika ngibahang pamuput wicara ring ngawiwenang upaminia ipun polisi, Lurah, Camat, Pengadilan Negeri miwah sane lian- lianan, utamane ring wicara –wicara kaduskertan wyadin pamurugan sane dahat mabuat sane rumasa tan sidha kapuputang awig- awig Desa Adat kemanten , upami kelangan, baak, pemerkosan, mati salah indik, nyimpen wyadin ngawedaran barang – barang sane tan kawenang , minakadinia senjata api, obat bius miwah sane lian –lianan.
9. PANUNDUNGAN : Utamane ring wicara sane mabuat ngajak warga Desa sane mawit saking dura Negara.
10. Miwah pamidanda- pamidanda sewosan, manut pararem- pararem.

Pawos 82

- (1) Sang sane sampun naenin kapidanda ring silih tunggil wicara yaning malih mamurug ring wicarane sane pateh, wenang kapidanda kadi ring sor :
 1. Ring ping kalihe, pidandania wenang katikelan ping kalih saking sane naenang katampi
 2. Ring ping tigane, katikelan ping tiga
 3. Yan lintangan ring ping tiga wenang kasepekang, raris kanorayang.
- (2) Yaning wenten silih tunggil krama banjar sane kanorayang ring banjarnyane, tur raris mamanan ngaranjing ring banjare sewosan ring wawidangan Desa Adat Mengwitani, Banjar sane kaungsi puniki tan wenang nampi ipun makrama irika. Yan mamurug, Banjar punika wenang kadanda sekadi pararem.



SARGA VII

NGUWAH NGUWUHIN AWIG AWIG

Pawos 83

Awig – awig Desa Adat Mengwitani puniki kauwah uwuhin melarapan :

- (1) Sesidan sidan indik ngewuwah ngewuwuhan sedaging awig –awig patut dumun kapidadabang ring Pararem – Pararem Prajuru Jangkep Desa Adat.
- (2) Yan tan presida medaling ring Pararem Prajuru Desa Adat wenang Manut ring Pakarsan Krama Desane Katahan, majalaran antuk paparuman Agung Krama Desa Adat manut abot dangan pariindikannyane.
- (3) Kacumponin antuk sanistania kalih pah tiga saking swara sane patut sareng parum.

SARGA VIII

PAMUPUT

Pawos 84

- (1) Awig – awig puniki kawastanin Awig – Awig Desa Adat Mengwitani.
- (2) Awig – awig puniki kamargiang ngawit kararemin melarapan antuk ngelingga tangani olih Prajuru sejangkepnyane.

Pawos 85

- (1) Sakalwiring awig-awig Desa Adat Mengwitani sane wenten saderengnyane awig – awig punika, tan wenang malih keanggen Pemutus, sejabani wantah anggen tetimbangan kemanten taler patut kaanutang ring sadaging awig – awig puniki.
- (2) Sakalwiring sane durung kabawos sejeroning awig – awig puniki taler sane ngemedalang pengartos sane samben (Multi Tafsir) patut kalaksanayang manut tata cara sane sampun ketah memargi kadulurin antuk pidabdab ring pararem –pararem.
- (3) Ring sejabanin Pemutus Peparuman Prajuru Jangkep wenang kedulurang manut sulurnyane luwire : Paswara – Paswaran Paruman , Pararem Desa Adat , Awig –awig Desa Adat.
- (4) Sane patut keunggahang ring Pararem Desa Adat inggian punika : Pamiteges daging Pawos Awig –awig sane keubah lan daging Paswaran Paruman Prajuru Desa Adat sane sampun pastika kemargiang sanistania a warse maka sami punika malarapan antuk tetimbangan Paruman Widya Sabha Desa Adat tur kaputusan / kecutatan olih Paruman Prajuru Jangkep
- (5) Jinah bolong wenang kagentosin antuk jinah rupiah manut pangargania duk punika utawi taler manut Pararem Desa Adat.



Pawos 86

- (1) Jiwatmanan daging Pawos ring Awig – awig puniki medal saking sami daging pawos sakaluwiring Awig-awig Desa Adat Mengwitani sane wenten sadurungnyane , kewahwuhin manut pakibeh jagate mangkin melarapan antuk Peparuman Jangkep Prajuru Desa Adat Mengwitani.
- (2) Awig – awig puniki kararemin duk *Rahina Redite, kalaning Sasih Sungsang warsa icaka 1937, pinanggal bulan miwah tahun Masehi 31 Januari 2016*, ring Pura Desa Mengwitani.
- (3) Awig –awig puniki kalingga tanganin olih Menggala Prajuru Jangkep Desa Adat Mengwitani kasaksinin Kepala Dusun sawewengkon Desa Adat Mengwitani, Perbekel Mengwitani miwah Camat mengwi, kacumponin saha kalingga tanganin antuk Bupati Kepala Daerah Tingkat II Badung maka Murdhaning pamikukuh.
- (4) Awig –awig Desa Adat Mengwitani keraremin lan kelingga tangani :

**Lwire sane ngelingga tangani olih :
Desa Adat Mengwitani**



**(I Putu Wendra)
Kelian Desa Adat**

Widya Sabha Desa Adat Mengwitani.



**(I Nyoman Keramas.SE.MM)
Menggala Widya Sabha Desa Adat**

Kertha Desa Adat Mengwitani



**(I Nyoman Subahari.SH.)
Menggala Kertha Desa Adat.**



Kelian Banjar Adat sewewengkon Desa Adat Mengwitani :

(1) Banjar Adat Culag-Calig. :

I WAYAN BUDI ASA




(2) Banjar Adat Wira Dharma.:

I MADE KAI UDAYANA



(3) Banjar Adat Sila Dharma. :

I G D A R D I P A YASA



(4) Banjar Adat Jumpayah. :

I Alayan Sandia.



(5) Banjar Adat Gunung sari :

I Putu Astika



(6) Banjar Adat Taman sari. :

I made kama sari



(7) Banjar Adat Batur sari. :

- INYOMAN GD. SUSILA



(8) Banjar Adat Delod Peken. :

- I MD BEDE OKA PANCA





(9) Banjar Adat Loda Pura. :

1. EST MOR GO SUASTAWA



(10) Banjar Adat Dajan Peken. :

1. MAOT JALIAOTNA



(11) Banjar Adat Dukuh Gong. :

- 1 Putu Suriasa



(12) Banjar Adat Panca Dharma :

- INYOMAN SUNDRA



(13) Banjar Adat Panca Yasa 1&2:

1. 163 NER KARTAYUDA



(14) Banjar Adat Panca Jaya. :

1. KETUT SUWITRA



(15) Banjar Adat Panca Warga. :

(Inyo Subarya)





Kepala Dusun sewewengkon Desa Adat Mengwitani :


(1) **Kepala Dusun Panca Warga:**


KEKAMATAN MENGWITANI
KELIAN BR. DIAS
PANCA WARGA
I PUTU MARDIANA
DESA MENGWITANI

(2) **Kepala Dusun Pupuan :**


KEKAMATAN MENGWITANI
KELIAN BR. DIAS
PUPUAN
(I MADE SUNARTA)


(3) **Kepala Dusun Dajar Peken:**


KEKAMATAN MENGWITANI
KELIAN BR. DIAS
DAJAR PEKEN
I MADE SUKAWAN
DESA MENGWITANI

(4) **Kepala Dusun Mengwitani :**


KEKAMATAN MENGWITANI
KELIAN BR. DIAS
MENGWITANI
I PUTU SANTIKA


(5) **Kepala Dusun Lebah Gunung :**


KEKAMATAN MENGWITANI
KELIAN BR. DIAS
LEBAH-GUNUNG
(I RADEK SUDANTA)


(6) **Kepala Dusun Jumpayah :**


KEKAMATAN MENGWITANI
KELIAN BR. DIAS
JUMPAYAH
I DEWA M M MERTAYASA

(7) **Kepala Dusun Sila Dharma :**


KEKAMATAN MENGWITANI
KELIAN BR. DIAS
SILADHARMA
I PUTU ATMAYA

(8) **Kepala Dusun Nyuh Gading :**


KEKAMATAN MENGWITANI
KELIAN BR. DIAS
NYUH GADING
I MADE JULIASMAN, ST



Lwire sane ngelingga tanganin pinaka nyareng nyumpuang tur pinaka saksi inggian punika :

Perbekel Desa Mengwitani


I MADE MURNANA, SS
(.....
NIP. 19671001 20070 11 023.....)

Camat Mengwi


GUSTI GURAH GEĐE JAYA SAPUTRA, S.Sos. M.A.P
(.....
NIP. 19750207 199311 1 002.....)

Mungguing kawentenan Tuntunan saking Manggalaning jagat Badung pariindikan polah palih ngaryanin Awig-Awig Desa Adat, manut sekadi sane kapidartayang ring Pemahbah Awig-awig Desa Adat Mengwitani puniki, sampun kecumponing olih Bupati pinaka Murdhaning Pamikukuh :

Bupati kepala Daerah Tingkat II Badung, Mangupura

Galah :.....

Pinanggal :.....